

東
華
續
錄

東華續錄

乾隆一百二

臣王先謙敬編

臣周淪蕃恭校

秋七月己酉調富勒渾爲兩廣總督以雅德爲閩浙總督浦霖爲福建巡撫福甯爲甘肅布政使調郭世勳爲湖南按察使以馮光熊爲安徽按察使

革任甘肅布政使

○庚戌陸燿以病解任調浦霖爲湖

南巡撫以徐嗣曾爲福建巡撫伍拉納爲福建布政使當保爲河南按察使

由直隸熱河道遷

○辛亥以湖北糧價增昂命發倉穀平糶○

己未諭軍機大臣等據何裕城奏請將丁憂知縣王垂紀留辦西安城工一摺此事不可行奪情非所以教孝古人惟於軍旅之事不妨權宜行之是以向來遇軍務緊急之時州縣官或有在任守制者至城工非軍務可比况各省皆有工程又何必須一人始終

經理而爲此破例之舉徒令該員戀職貪榮致滋物議所奏不可行著傳諭何裕城卽飭令該員回籍守制○庚申以瑞保爲內閣

學士

由翰林院侍讀學士遷

○辛酉諭軍機大臣等據畢沅奏薯蕷向以懷

慶所出爲佳性與山蕷番薯同類番薯藏種在霜降以前下種在清明之後計閩省乘時採擇郵寄此開尙不爲晚但聞其種易爛易乾須用木桶裝藤擁土其中方易攜帶兼聞藤本須帶根者力厚易活等語前雅德來熱河召見曾諭以將番薯藤種採寄河南據奏路過山東沂州府亦見該處種有番薯而豫省懷慶所出薯蕷性與同類此物既可充食又能耐旱河南山東二省頻歲不登小民艱食畢沅明興當卽轉飭各屬勸諭民人倣照懷慶沂州廣爲栽植接濟民食亦屬備荒之一法至豫省卽產薯蕷則番薯一種閩省亦毋庸多寄但必須覓帶根藤本用木桶裝盛擁土其中

如法送豫方能栽種易活著傳諭雅德卽行照式妥辦由驛速寄

將此各傳諭知之○陳川敷丁憂以李慶霖爲貴州巡撫李封爲

江蘇布政使

由福建汀漳龍道遷

○乙丑撥戶部銀一百萬兩解往河南備

賑

○丙寅諭軍機大臣等據孫士毅奏清查通省民欠銀米一摺

內稱自上年到任以後卽屆奏銷雖據藩司申報全完而各屬批

解必待嚴催情事甚屬竭蹶應當與藩司悉心查究緣粵東每年銀

米二項均有民欠州縣自顧考成未肯甘心墊解直至奏銷已屆

始行設法措墊趕上奏銷藉免處分及事後向民間追繳狡黠之

徒揚言奏銷已報全完有何民欠竟爾分毫不繳年復一年欠戶

恃爲得計通省積弊如此見在出示曉諭並委令試用知縣丞倅

等官赴民欠最多地方逐戶查對並令通省州縣挨造四十年以

後民欠清冊詳報覈辦所有將來迫出銀米如係見在州縣本任

內所欠甫經墊解尙無別項流弊仍請給還本任等語各省解司錢糧例有一定奏銷之期州縣官徵收銀米固不許有絲毫侵掩乃以積欠在民之項竟甘心墊解冀免考成而庸懦州縣不能於事後復向民間追取粵省民情獷悍竟至於斯吏治民風大有關係從前李湖素稱風厲而於民欠一事何以竟未能辦及孫士毅由廣西調任廣東朕謂其人尙屬細心曉事不料其竟能如此辦理實屬可嘉此事業經該撫究出底裏自當通行查辦實力追繳於別弊之中勿使稍有滋弊孫士毅前奏飲食少減精神恐不如前此時想已就愈惟當勉力爲之不可畏難亦不可過急致滋擾累至所奏追出銀米如係在州縣本任之內所欠仍請給還本任等語此則不可州縣催徵錢糧是其分內專責乃平時不能振作致民間積漸拖欠及至奏銷時冀避處分私行墊補報解全完此

等人員不治以捏報之罪已屬寬典若將追出銀米仍行給還私
裹則將何以示儆所有此項錢糧將來自應歸公充用不得因欲
杜該員等藉口虧賠爲此以公便私之舉再粵東一省既查民欠
累累情弊亦非一日恐各省似此者亦復不少此事於地方關繫
非小著將孫士毅摺鈔寄各省督撫閱看並令妥密查辦據實奏
聞但須不動聲色持之以漸不可使不肖官吏紛擾滋事也將此
傳諭孫士毅並諭各省督撫知之○丁卯諭軍機大臣等據薩載
等奏會議酌定漕船尺寸事宜以利輓運一摺已批交大學士九
卿議奏矣至摺內稱各丁隨帶土宜定例重運船隻每船許帶土
宜一百二十六石免其納稅惟是近年什物價值每件增昂長途
輓運用度不無拮据與其任不肖旗丁暗中舞弊不若明定成規
俾可遵守請於例帶土宜一百二十六石之外加帶七十四石共

成二百石該丁等得霑餘利自必踴躍歡欣益加用力趨輓等語殊不成話旗丁應帶土宜一百二十六石乃係歷年定例仍不免例外多帶據該督奏請此後以二百石爲率可見歷來私帶明在例限之外所謂籤盤查驗者何事旗丁等既可於一百二十六石之外多帶私貨此時卽加至二百石安能保其不於二百石之外又復多帶似此逐漸增加伊於何底且稱與其任不肖旗丁暗中舞弊不若明定成規俾可遵守夫此一百二十六石豈非向定成規該督等業旣視爲具文任憑旗丁舞弊多帶而謂加至二百石之後卽能永遠遵守不加有是理乎前因漕船高大沈重喫水過深易致淺滯是以令將高寬尺寸倣照民船量爲減損今欲減漕船之尺寸而轉准旗丁多帶土宜則船載愈重若遇河水淺阻又須節節起剝何必多此一番更張該督等身膺重寄於漕船多帶

私貨行走濡遲之處既不能嚴行查禁竟如墮瞽而又爲此夢鑒之語率行陳奏不知是何意見薩載久任封疆尙爲歷練曉事何近來辦事糊塗若此豈竟衰病相乘遂爾精神昏憤耶薩載尙然如此則毓奇之初任漕務者更不足論矣薩載毓奇著傳諭嚴行申飭並著大學士九卿遵照諭旨將旗丁多帶土宜之處嚴切指駁又薩載等另片奏稱河口淤淺處所撈挖漸深漕船陸續渡黃等語昨已有旨諭令該督等酌量情形截留起卸實不能到通阻凍者莫若早行截留於江南以省其往返該督等惟當遵照妥辦迅速奏聞以慰廑注將此諭令知之○辛未命截留漕糧十萬石於直隸備賑○乙亥伊犁將軍伊勒圖卒賞銀一千兩治喪晉封一等伯命其子哲臣泰承襲○丁丑多羅貝勒允祁薨遺疏聞諭朕長輩內惟二十三貝勒獨存前聞患病當遣皇八子帶領御醫

前往診視冀其速痊茲據弘曩等奏已於二十七日薨逝聞之深
爲惻惻仍派皇八子往奠茶酒應得卹典照郡王例辦給尋予祭
葬諡曰誠

八月戊寅朔命於截留江西漕糧內酌撥十萬石分給淮安等五
府屬平糶○己卯諭古樂以宮商角徵羽爲五音合諸變宮變徵
則爲七音今之樂猶古之樂何以樂部所奏樂章僅以五六工尺
上等爲音而問之以宮商角徵羽則茫然不知爲何事近偶閱張
照所奏論樂劄子辨析頗詳其所謂五六工尺上卽宮商角徵羽
甚合古意因復取律呂正義再加參覈本屬相合因思今之五六
工尺上與古之宮商角徵羽名雖異而實則同聲音之道原欲避
俗趨雅今反援雅而歸俗甚非道也况 郊 廟樂章格 天歌
祖正朝御殿敷政臨民鐘簾元音自應用古制爲節奏今樂部

所定樂章俱取駢注工尺揆諸名義殊乖莊雅但相沿已久若猝
令樂工等改習宮商角徵羽則心手俱所未嫻其勢亦有所難朕
意俗用工尺既與宮商角徵羽相同嗣後雖令樂工等取用工尺
等字而於樂章每章每字下則兼注宮商角徵羽變宮變徵字據
皆令兼知則不但川諸 郊 廟朝廷倍彰莊雅而以此潛移默
化漸復古音未始非返樸還淳之一道再古樂中琴瑟與金石並
重近來樂部奏樂琴或閒能操縵而瑟則竟屬虛陳卽業儒之人
雖偶有學琴者已非古道至於瑟則未有能鼓者是瑟之爲道久
已失傳夫八音迭奏琴瑟相宣豈容偏廢向來樂部奏樂俱因笙
笛聲細爲其所掩絲不如竹古已有其語是以樂工等罕有嫻習
者殊非八音咸備之意從前勵宗萬爲太常寺少卿時寺丞張樂
盛編輯 壇 廟樂章勵宗萬爲之作序維時已有律呂正義一

書而張樂盛所編書內樂章並不倣照兼注宮商輒專注工尺勵宗萬又不爲之定正所謂不學無術不可與言樂亦安能窺律呂正義之博洽賅備耶然律呂正義一書卷帙旣繁剖析又極精微樂工未易領會德保係禮部尙書太常寺樂部皆所綜理莊存與則禮部侍郎而兼管樂部著德保莊存與向武英殿咨取律呂正義刻本一部將律呂正義書內每字下並注宮商角徵羽及五六工尺上字樣者摘出令樂工按書演習精熟並著將琴瑟二樂飭令樂舞生一體用心嫻習蓋黃鐘爲萬事根本五音十二律還相爲宮而所謂三分損一隔八相生之說其義原可貫乎今之工尺蓋黃鐘生大呂至半大呂而又生黃鐘夫黃鐘宮也以宮商角徵羽變宮變徵之位言之則爲七以其相生之數言之則爲九此隔八之說所由來也如歲時之有八節遞嬗而歲時成矣今之五六

工尺上四合合字音之終也而卽以生五生生不窮自爲循環所謂貞下起元聲音之道與政通也著德保莊存與悉心講求檢閱於律呂正義一書取要節繁輯爲簡要一編會同軍機大臣酌定繕寫進呈刊發再律呂正義中原有御製補笙詩六首駢注工尺宮商字樣著一併入編頒發學宮肄習以示作樂崇德協律同和之至意○諭前據何裕城奏請將丁憂知縣王垂紀留辦西安城工一摺已批所奏不可行並諭該撫卽飭該員回籍守制昨又據富綱奏請以丁憂雲州知州宋昌琿接辦甯臺廠務亦批不必令另選合例之員具奏矣奪情起復非所以教孝敦倫古人惟於軍旅之事偶一行之若地方遇有不靜如撒拉爾逆回等事軍務緊要其承辦軍需之各州縣設遇丁憂該督撫自不妨奏請權令在任守制至城工銅廠非軍務可比又何必需一人始終經理而爲

此破例之舉設遇其人病故又將如何豈必待起死回生而後可不至乏員辦事耶大抵該督撫之爲此奏非徇情市恩卽係該員干求請託並非專爲地方政務起見徒令此等在任守制之員坐擁廉俸戀職忘親轉藉王事羈留不得稍盡人子之禮資爲口實於官方政化俱有關係著通飭各省督撫嗣後非遇軍務不得以丁憂人員奏請留任著爲令○庚辰諭軍機大臣等據明興奏陸燿於山東臬司任內曾刻有甘薯錄一編頗爲明切易曉見飭多爲刊刻頒行各府州縣分發傳鈔使皆知種薯之利多爲栽種等語所辦甚好河南頻歲不登小民艱食前已諭令畢沅轉飭各府州縣倣照懷慶府屬廣種薯類卽直省迤南各府今年亦因雨澤愆期收成歉薄番薯既可充食兼能耐旱且東省各府旣閒有種植自不難於就近購採朕閱陸燿所著甘薯錄頗爲詳晰著卽鈔

錄寄交劉峩畢沅令其照明興所辦多爲刊布傳鈔使民間共知其利廣爲栽種接濟民食亦屬備荒之一法將此傳諭知之○壬午免各省四十年以前積欠耗羨○甲申以湖北旱命四川江西發倉穀平糶俾商販運楚以濟民食○乙酉命阿桂赴河南勘災兼赴江南山東查辦賑務○丙戌諭據特成額奏湖北潛江鍾祥二縣應修民隄先行借項興修仍於有隄業戶名下分別徵還共用過銀七萬八千五百餘兩經部駁減銀一萬九千六百餘兩請於承辦各員名下勒限催追俟繳齊時發商營運生息以備再有工程動支給發等語工程動項興修自有勘估原冊及工竣報銷部中覈減亦必有一定章程今湖北省借項興修隄工動用銀七萬八千五百餘兩此必因當仍徵於民之項地方官任意浮冒多估爲營私之地也設如部中覈減不過數千兩尙在情理之內乃

竟駁減至一萬九千六百餘兩之多則是七分之二矣設遇數十萬兩之工程竟將覈減至十餘萬兩有是理乎此在部中非書吏婪索不遂藉端苛駁卽係司員希圖漁利分肥與書吏串通一氣甚或該堂官等亦思染指有意苛求均未可定矣卽使無此等情弊而駁減如此之多若該省皆實工實料該督撫等當據實直奏部駁之苛求朕亦自有辦理之法今竟受之是承辦工程各員必有浮冒侵蝕之弊不然何至有甘受覈減屈意認賠之理且向來工部遇有此等浮冒如海塘及韓莊歲修閘壩等工皆係專摺奏明查辦有案此案以七萬餘兩工程竟至駁減七分之二何不奏聞請旨飭查僅照例題本完結此事著交留京王大臣傳集工部堂司各官拘提書吏並調齊報銷冊籍覈減例案秉公查詢有無前項情弊據實具奏該督撫亦著明白回奏其特成額所奏覈減

銀一萬九千餘兩追完發商營運以備再有工程動支之處著照所請行○辛卯諭軍機大臣等海祿等奏據保成等報稱燕起伯爾克糾集薩木薩克呼達雅爾人等圖掠喀什噶爾等語燕起等果欲圖掠喀什噶爾亦必先向那爾巴圖葉勒鐵拜游牧攻劫斷無越此二處卽至喀什噶爾之理自係那爾巴圖聞燕起等欲掠伊游牧故意遞信思藉我兵威以資捍衛奎林等斷勿墮其計中若請援兵卽行駁斥仍當鎮靜偵探相機辦理勿涉張皇將此諭令知之○癸巳 上自避暑山莊巡幸木蘭行圍○己亥以浙江杭嘉湖三屬糧價增昂命發倉穀平糶○癸卯諭山西巡撫農起自簡任封疆以來辦理地方事務頗能實心整頓今聞溘逝殊屬可惜所有任內降革處分准其開復其應得卹典著該部察例具奏尋予祭葬○以伊桑阿爲山西巡撫梁肯堂爲直隸布政使調

當保爲直隸按察使以穆克登爲河南按察使

由江西廣饒九南道遷

九月丁未朔諭軍機大臣等據薩載等覆奏清口淤淺緣由一摺
內稱從前黃河南岸之陳家道口漫溢大溜下注洪澤湖由清口
而出湖中未嘗積淤皆因經由支幹各河縣遠入湖之水已漸淤
清今祥符五瑞二閘由引河至湖邊相距有四十里之遙所挾之
沙亦不過停於引河兩腮及湖西邊岸等語所奏殊屬自相矛盾
從前陳家道口漫水下注洪湖旣因經由支幹各河縣遠是以漸
次淤清湖中不至淤積今祥符五瑞二閘離洪湖不過四十里相
距甚近所挾之沙焉能卽行淤清不至淤墊湖底是引黃入湖未
必能助清濟運而停沙淤滯恐轉足爲洪湖之害薩載李奉翰不
過因此時別無善策爲此無聊之極思恐伊二人竟茫無主見以
致洪湖重受淤墊所關匪細著傳諭阿桂前抵清口後務將伊等

所奏情形悉心籌酌爲之主持定議方爲妥善至海口淤淺見據薩載等奏稱實因本年湖水極小是以未能出口抵禦黃流以至倒灌入運等語其受病根由是否實係如此及作何籌辦之處並著阿桂熟商妥議務期斟酌盡善一併據實具奏以慰廑注將此諭薩載知之○戊申諭軍機大臣等前據海祿奏准保成等札稱偵探燕起伯爾克等糾眾掠取喀什噶爾事屬子虛不可深信茲又奏請調伊犁烏嚕木齊兵四千名分防喀什噶爾烏什葉爾羌三城等語前後自相矛盾燕起伯爾克等不過么麼蠻匪果能糾眾掠取那爾巴圖游牧實有窺伺喀什噶爾情形屆時再行調兵備禦尙不爲遲至烏什葉爾羌等城則更風馬牛不相及何必亟亟請兵徒滋驚擾海祿身爲參贊大臣遇有此等事件惟當鎮靜料理豫爲防範如此畏葸失措適爲回眾所輕著傳諭海祿親往

喀什噶爾會同保成等妥酌偵訪不得稍涉張皇並著奎林遴派
委員於伊犁各卡帶兵密探一有伊等侵犯喀什噶爾之信卽將
將軍印務暫委那旺護理一面札令塔爾巴哈台參贊大臣惠齡
速赴伊犁署理將軍事務一面具奏帶領弁兵迅赴該處相機妥
辦勿稍輕忽○己酉諭軍機大臣等昨據海祿奏請於喀什噶爾
等處調兵防守措置失當若不豫爲備辦轉恐貽誤事機著傳諭
福康安卽帶總督印篆速赴阿克蘇一帶安輯回眾並密爲偵探
儻燕起伯爾克等實有侵擾情形卽會同明亮福甯妥爲籌辦調
撥該處及烏魯木齊甘肅等處兵迅速前進仍札會奎林令其統
領伊犁兵兩路夾勦或應需回兵在各處防堵亦卽酌量調用海
祿辦事錯謬若仍留烏什恐至掣肘著革去參贊大臣在伊犁領
隊大臣上行走以觀後效明亮久歷行閒著署理烏什參贊大臣

卽赴阿克蘇與福康安悉心辦理慶桂前在塔爾巴哈台辦事頗
爲歷練見在樞廷行走有年於朕調度軍務係所熟悉著帶欽差
關防迅卽起程馳往甘肅暫署總督印務俟事竣後授爲烏什參
贊大臣明亮仍回伊犁參贊大臣之任將此各諭令知之○甲寅
上駐蹕避暑山莊○乙卯諭軍機大臣等阿桂奏清口淤墊情
形一招稱本年湖水極小不但黃強清弱至六月以後竟至清水
涓滴無出黃水又值盛漲以致倒灌入運直達淮揚見在陸載等
所開祥符五瑞二閘自引河至湖邊有四十里之遙或可不至淤
湖且任其權時開放爲今之計惟有借已灌之黃水以送回空蓄
積弱之清水以濟重運此時湖水不能復出竟應築壩煞住使湖
水停蓄明春重運北上時卽可啓壩下注引河出抵清口以資利
濟等語亦止可如此辦理本年春夏以來旣因雨澤短缺湖水甚

小六月後清水至涓滴無出薩城等卽應先事豫籌將清口兩壩酌量收束以爲蓄水地步何以並不等及亦並不奏聞伊等之意不過以築作壩工未免需費遂爾因循不辦不知彼時築壩所費尙屬有限今黃水倒灌淤沙梗墊始議煞壩蓄水已屬遲誤漕運將來清空非易所費更屬不貲豈非因小而失大乎是薩載李奉翰於此一事實難辭咎著阿桂查明據實參奏見在清口旣已淤墊自止可借已灌之黃水俾回空得資浮送俟回空船過完卽當築壩令黃水不復倒灌入湖庶湖水日漸停蓄以濟明年重運阿桂卽當相度機宜迅速妥辦俾明歲新漕無滯庶有裨益又據阿桂奏稱江北之淮徐等處麥收失望秋禾俱未補種目下正屆播種秋麥之時必須九月內得有透雨方可乘時翻種等語江北一帶旣久經缺雨田禾未能播種地方官早應設壇虔祈以冀甘膏

速沛何以薩載總未奏及看來伊等因湖河淤墊一錯百錯知識昏瞽竟至諸事茫無所措阿桂必須爲之主持定見並傳諭薩載李奉翰當安心勤事倍加奮勉以期補過仍著該督等將何以並不收束兩壩及曾否飭屬虔祈雨澤之處據實回奏○戊午調何裕城爲江西巡撫永保爲陝西巡撫○庚申停止佐雜等官保薦卓異後送部引見○辛酉諭軍機大臣等節次據阿桂奏到籌辦清口情形借黃水以送回空蓄清水以濟重運並於清口築壩煞住及陶莊河尾另開口門各節已屢經降旨令其相機妥辦繪圖貼說呈覽矣從前治河之道惟有導清攔黃不使倒灌今轉引黃水入清口以資浮送自屬下策但該處既經淤沙梗塞舍此別無引水善策亦不得不如此辦理然其事究屬可暫而不可久必須設法疏治俾清水日漸旺盛以期暢出刷沙於事方有裨益又無

錫一帶河路竟至乾涸不特明歲新漕可慮目下回空船隻何以行走所關尤爲緊要應如何酌籌辦理之處更當及早施工俾漕艘得以通行無滯至一切收蓄疏濬事宜非一時可以完竣阿桂自不能久稽該處著將清口及無錫一帶緊要處所料理妥協定有章程後卽交與薩載李奉翰遵照妥辦阿桂酌量情形於今歲回空及明歲重運均可進行無誤不須在彼久稽卽當回至山東閱視湖河再赴豫省查勘新隄及災賑事宜於年底可以順道回京將此諭令知之仍將見在洪湖清口情形及無錫一帶作何籌辦之處迅速覆奏以慰廑注○壬戌 上自避暑山莊回鑾○丙寅諭本年考試翰詹其講讀等官考列三等者應以中允贊善降補但該員等本以文理平常因考降職若仍以翰林補用將來再遇考試恐仍不免於降官且中允贊善員缺本少降補之後得缺

亦屬無期轉致淹滯嗣後翰詹等官凡遇考試應行降補者俱著對品以部屬補用俾得及時自效若果能勤奮供職自可仰邀甄拔是亦造就人材量才器使之道著爲令所有此次接駕之張燕莊承錢卽著對品以主事改補○諭薩載李奉翰於清口東西壩不能及早收束以致運道淺阻經阿桂查明參奏已降旨將薩載李奉翰交部嚴加議處第思部議不過革任見在一時任使乏人亦不卽予罷斥仍可從寬留任恐伊等益無顧忌不知儆戒薩載李奉翰辦理河務種種錯謬其過甚大如運中河已經挑竣猶兒窩應建閘座並不迅速趕辦以致山東所放之水並無攔蓄一洩無餘重運不敷浮送又本年雨澤短缺薩載等於上年前往洪湖查勘時湖水已經漸弱卽應將清口東西兩壩漸加收束豫爲蓄水地步若收束十丈湖水卽可得十丈之益乃並未先事籌辦仍

留二十丈之清口聽其散漫下注至黃水倒灌入運停沙淤阻又並未將淤阻情形據實具奏直待降旨詢問知不能掩飾始行陳明實爲因循貽誤又無錫一帶爲漕運及商賈經行要路該處河道乾涸並不早行奏聞設法辦理伊等職司地方河務乃智識昏瞽漫無主見若此其咎實百喙難辭薩載李奉翰竟無庸交部議處著照從前內外大臣降職之例俱降爲三品頂帶以示懲儆而觀後效至閔鶚元於河道雖非專管但河路乾涸不特漕艘難行卽往來商旅船隻亦多不便此獨非地方事務而竟置之不問耶乃無錫一帶乾涸已久閔鶚元並未專摺具奏直至事難掩飾始於陳奏事件摺內帶敘數語且所稱農民昕夕車戽以致淺阻等語亦屬非是該處農民被旱戽水灌溉原所不禁但灌田固所以爲民濟運亦關繫緊要昨據嵇璜奏稱江南佃戶遇旱乾年分戽

水灌田卽可向田主折算工價少納租銀是個戶固樂於車戽而地方官不可不爲之酌立限制卽如河南衛河百泉等處於濟運灌田俱各定有分數不使偏畸該撫身任封圻乃竟視同膜外亦屬咎無可諉閔鶚元著交部議處至該督撫等於此等地方要務並不據實直陳其意不過謂奏聞後恐致朕心焦勞殊不知朕臨御以來日理萬幾於地方水旱雨暘豐歉情形凡有關於國計民生者宵旰勤求五十年如一日今雖年逾古稀披覽奏章運籌指示從不以爲煩瀆較前有過之無不及該督撫等甯不知之如果隨時入告正可洞悉機宜得其竅要我君臣先事疇咨使民生政務均有裨益豈不甚善又何必過爲仰體匿不上聞若至地方廢弛貽誤始行奏達轉增事後籌畫之煩亦豈朕委任封疆之意且果如此將來設有貪官污吏以及不逞滋事等要務亦將抑閣而

不以入告耶此番治薩載李率翰之罪之意正在於此將此通諭各省督撫一體懷遵成諭朕意儻從而效尤則薩載等卽其前車之鑒也○戊辰 上還京師○乙亥諭前命阿彌達前往青海述上窮溯河源旋京具圖呈覽隨御製河源詩文並令館臣編輯河源紀略錄入四庫全書以昭傳信四庫書中從前言河源者甚多從未有探本窮源以及方向山川皆能符合者近偶閱河防述言一書卷首冠以河圖朕詳加檢閱內所載源流方向山川形勢與阿彌達所奏相符此圖爲張鶴生所著其書則採述陳潢議河之言彙輯成編頗爲精當因思河源之說從來疑信參半歷數千年今始考詢明確而張鶴生之圖在數十年之前適與今圖脗合乃其書沒而不彰非所以揚善誌美也著四庫館總裁卽將河防述言一書錄入四庫全書附於靳輔治河奏績一書之後以示朕

博採羣言片長必錄之至意○命鄉會試二場論題以孝經與性理二書按科輪出著爲令○定月選官告病期限○丙子諭軍機大臣等畢沅奏查濬淮源一摺稱淮瀆廟東里許有石砌基地一方空深三尺許有泉源湧出共計三處當卽趕緊淘濬引歸河身下注暢達等語所辦甚好至圖內所繪淮水發源之桐柏山處所有無池泉匯湧應行疏濬之處前江蘭查勘時曾否親至其地著將原圖發交閱看令將該處情形據實具奏並繪圖貼說呈覽又淮瀆廟已據畢沅勘估興修其桐柏山下之禹廟是否不至傾圮如應行葺治並著畢沅委員勘明一併興修以昭誠敬而妥神佑將此傳諭知之

冬十月戊寅富保卒以英善爲直隸按察使

由副都統遷

○己卯諭軍

機大臣等江蘭奏查濬淮源一摺據稱淮瀆廟東里許有砌石基

址試挖至三尺許有三大泉湧出查一統志稱淮水伏流數里湧起三泉潞爲井與見在查出之源相合等語該處創出三泉旣與一統志所載相合則所稱淮水伏流源泉自必有本前於圖內用硃筆圈出處所當是源泉之所江蘭查勘時自未必親至其地已降旨詢問並將原圖發交閱看著再傳諭江蘭卽赴該處勘明淮水伏流三泉其發源究在何處如有壅塞應行疏濬之處卽當迅速辦理至禹廟亦已諭令畢沅派員查看如應行修葺卽著遵照前旨勘估興修以昭妥侑將此傳諭畢沅並諭江蘭知之○辛巳裁綏遠城滿洲官學五處設繙譯官學五處○予故和碩裕親王廣祿祭葬謚曰端○壬午諭畢沅奏閩省監生陳世元赴豫教種番薯旣可充食又可耐旱特令富勒渾等採寄河南栽種陳世元因熟悉樹藝之法情願赴豫教種年老遠涉頗屬急公今患病身

故殊堪憫惜陳世元著加恩賞給國子監學正職銜俾該生得邀身後之榮並著畢沅妥爲照料交伊子護送回籍其子服滿願來引見亦聽○癸未諭前御史劉紹錦條奏各省保題卓異佐雜人員無庸送部引見一摺經部議覆准並請嗣後各省奏請揀發佐雜人員由欽派大臣揀選照數發往亦無庸帶領引見已依議行矣今思各省佐雜人員職分本微若令其赴京引見往返盤費未免竭蹶且該員等升補正印時仍須送部引見則見在停其赴京正所以體恤微員至各省奏請揀發人員向例欽派大臣揀選帶領引見候朕欽定發往今將此項佐雜人員亦一體停止引見在欽派大臣俱係深受朕恩之人自不至稍涉徇私任意揀選然行之日久不能保其必無而外間議論將謂朕倦於庶務故將此等人員一概無庸引見殊失朕惟日孜孜之意朕御宇五十年綜理

萬幾久而不懈今雖年逾古稀精神如舊豈因數丞倅微員而卽
倦於察看耶所有各省保題卓異佐雜人員應照部議無庸引見
以省其盤費外其各省奏請在京揀發佐雜微員由欽派大臣揀
選者仍著照舊帶領引見發往○丁亥諭軍機大臣等據江蘭覆
奏查勘淮源至淮水伏流處所洶濬得泉眼三箇湧發下注河流
旋即加長似係當日導淮之所至胎簪山腰有古廟一座前有池
水一泓詢之土人據稱係淮水泉源旱潦總無消長等語淮水發
源胎簪山伏流微細今旣於出見處所洶濬泉眼湧注河流自卽
係當日導淮遺址至所稱胎簪山腰有古廟一座不知何年所建
胎簪爲桐柏支山當時建廟所奉何神是否卽係淮瀆或係禹王
神像指內並未查明聲敘著傳諭畢沅卽查勘明確一併葺治以
昭誠敬其廟前水池一泓據稱水潛行山內相傳至禹廟前流注

成河該處既有水池潛行無涸自係淮水真源亦著畢沅略行疏
濬毋致淤壅更於全淮有益將此傳諭畢沅並諭江蘭知之○癸
巳諭軍機大臣等據保成奏稱詢問索勒屯部落比尼沙之子多
里雅特據稱薩木薩克等會集一處前往呼達雅爾並向伊等求
助等語從前朕以此等流言或係鄂斯璊編造以惑保成故令福
康安前往訪查酌量情形將伊調往葉爾羌今多里雅特之言亦
復如是看來鄂斯璊尙無別情若遽將伊調遣轉屬不妥著傳諭
福康安到彼相機籌酌不必拘泥前旨○甲午諭李侍堯於辦理
逆回滋事案內玩誤因循因念其歷任封疆於地方事務尙屬諳
練是以從寬未將伊寘重典令其覲坐囹圄自思罪戾今念伊獲
譴以來已經緩決監禁兩年著加恩釋放出獄令其引罪家居捫
心自愧以示朕格外矜恤之意○丙申諭軍機大臣等據保成奏

稱烏帕爾塔什密里克地方有布魯特百餘人前來盜馬二百餘匹槍傷兵丁五名等語此項盜馬之人恐卽近日投降之布魯特等五十戶或係燕起屬下使之前來窺探消息亦未可定保成務須上緊追拏毋使一名漏網拏獲時審明有無勾通若果係燕起遣來之人喀什噶爾應如何嚴設卡座加意防範之處著福康安妥協籌辦並傳諭阿揚阿色提巴爾第等遣派妥人探聽信息據實具奏○丁酉諭每歲春三月應祭先農壇行耕耤禮禮部俱先期將祭祀日期及耤田一應事宜豫行具題雖屬照例辦理但國家典禮以實不以文朕臨御以來兢兢以敬天勤民爲念郊壇大祀無不躬親卽耤田親耕亦從未嘗稍憚煩勞雖本年壽已七十有五猶親舉三推之典惟是春秋已高或恐步履稍遜若二三年後自揣精力如常偶一舉行豈非熙朝盛事至本年甫

經親行耕藉明歲應否躬蒞自應候朕酌行乃禮部仍照例具題
竟似每歲俱親詣行禮者然豈不轉爲具文耶我國家受命延
洪純嘏敷錫世世子孫若能皆似朕之敬勤不倦自必景祚縣長
享國久遠朕所用古稀天子之寶特於乾清宮存貯一分若我子
孫內有享永祚而登上壽者亦得鈐用此寶洵爲社稷靈長之福
嗣後我子孫繼承奕禩惟當不懈益勤凡遇親耕典禮若年在六
十以內禮部自應照例具題年年躬行耕藉之禮若年逾六十令
禮部先期以親蒞或遣官之處具本題請庶鉅典不尙虛文而展
禮益昭誠恪著爲令所有此次禮部具題一本卽著照此旨改繕
進呈○己亥設甘肅循化廳學校建文廟○丙午撥湖南倉穀
十萬石解往湖北平糶

十一月庚戌命奉天採買麥二萬石運京備糶○辛亥諭前因樂

部所用樂章僅以五六工尺上爲音間以宮商角徵羽茫然不知爲何事因命德保莊存與將律呂正義一書取要節繁輯爲簡要會同軍機大臣酌定繕寫進呈今據將各樂章酌定酌加按語開單呈覽朕詳加披閱與從前張照所論原屬相合不過拘泥黃鐘爲宮之說各調俱以羽字起羽字止其實如郊壇及御殿萬壽所用樂章自應以黃鐘爲宮羽字起止至每月所用樂章則應以每月本律爲宮如太簇爲正月主宮正合人生於寅之義其餘逐月皆依律呂相生所謂旋相爲宮者此也今閱所進清單按照樂章將五音配合兼註已屬明晰毋庸另爲一編著與旋宮圖俱附入律呂正義後編並於四庫書內一體補入並將前奉諭旨及此旨冠於律呂正義後編篇首俾講求樂律之士及肄習伶官俱曉然於宮商角徵羽五音共知避俗趨雅援今入古而仍不禁其五

六工尺上俾雅頌各得其所云爾○諭各部院衙門保送京察一等人員例應比照上屆之數咨送吏部向來辦理未能畫一殊失慎重程材之意夫三年京察一次原以激揚黜陟期於無濫無遺見屆明年京察之期著各該堂官將屬員才具賢否秉公察看照上屆四十八年保送一等之數出考送部毋許溢額致啓濫觴以後卽定以爲例但向來有人數比上次多者吏部必駁之語此則不可或該堂官因一人少不足額填送卽於各部時聲明缺額幾員何妨至下次京察若果出色之員較多仍許其補還原額吏部亦不必以上次既經缺額卽行予駁也若一次少一次則將來無人可舉成何政體若各部恐致數少勉強足數以符上次是又徇情虛應故事總成笑談矣今應定例率以不溢四十八年一等原額爲準至各省舉行大計與京察事同一例前屆甘肅湖北江

西等省分因各屬內處分人員較多是以比歷次卓薦人少自不可援以爲例而向來各督撫保薦人員本未明定限制亦非慎重考績之道且各省卓異人員有正薦附薦之名同一卓薦而分正附是名爲區別實易開僥倖之漸殊不足以激敎官方著吏部詳覈各省大小缺分多寡酌中定制除有處分不合例人員毋許保薦外其某省應行卓薦幾員之處按其缺分多寡定額並將附薦之名裁去勿使庸材濫膺薦剡而才能之員不至稍有沈抑該部卽詳晰妥議具奏尋議嗣後大計卓異人員計省分大小缺分多寡分州縣以上至道員爲一項佐雜教職爲一項俱比照上三次酌中定額至附薦一項卽歸入正薦數內不得仍存附薦名目如不敷原額准其聲明下屆仍照定額辦理儻保舉不實將原保上司議處從之○王子諭本日句到朝審官犯內故殺妻之海昇一

案該犯情節與尋常毆妻至死者不同朝審情實黃冊新舊各案朕無不詳加披閱如舊案內殺妻之滿成素卜東阿等或因妻忤逆伊母或因伊妻持刀撒潑死者本屬理曲是以量爲寬減卽不予勾海昇之妻並無此等情罪卽云有詈罵之語不過夫妻口角亦毫無憑據況因爭鬧細故一時氣忿致死伊妻尙屬情理所有乃海昇旣已殺妻仍復裝點自縊情形希圖避重就輕居心已爲狡詐伊係阿桂姻親阿桂又不免意存袒庇以致刑部堂司各官均有瞻徇迴護之見若非屢次派員覆檢幾致始終蒙混且由此釀成重案眾人皆因之獲罪該犯殺妻雖非必死之罪而實有必勾之情外間無識之徒或以見在勾到時阿桂尙未到京無人爲之解救以致予勾則更屬可笑試思朕何如主豈阿桂在朕前竟能飢法救人而朕卽聽信其言竟置人命重案於不問耶是海昇

之死阿桂非惟不能救之而適足以殺之也朕於讞獄大典斷不肯稍有偏聽務期刑法之平將此通諭知之○諭軍機大臣等據保成奏稱審訊多連拏獲賊犯和扎什供稱盜馬人眾係燕起帶來之人燕起見在河資地方力甚困窮已密遣雅斯潛覓與燕起有隙之占圖爾令其擒獻等語此等賊犯既非從前來歸之布魯特又非薩木薩克伯爾克之黨羽從前流言竟屬荒唐今燕起力窮仍敢前來盜馬實乃天奪其魄若能乘此拏獲即可盡絕根株前聞喀什噶爾傳播流言朕尙恐鄂斯瑞妄生疑懼因特派福康安前往酌量調遣今據保成審出情節鄂斯瑞竟可不必更調此旨到時卽著福康安明白宣示仍曉諭鄂斯瑞嗣後一切事體仍宜照常奮勉○庚申以張若淳爲左副都御史由通政使遷○壬戌調姚梁爲廣西按察使以額勒春爲江西按察使由陝西潼商道遷○甲戌

河南巡撫畢沅奏前命履勘淮源臣親赴桐柏山至陽口地方乃淮水伏流發見之所似非初源遂行至山頂見大石盤陀廣十數畝石旁有潭圍徑丈許泉深尺餘汲之不竭其爲淮瀆眞源無疑計自山頂至陽口上下三十餘里中間井泉不一俱匯陽口入河得旨知道了御製淮源記曰今歲豫旱於春夏荆欽旱於夏秋因循淮水弱而清口淤旣而豫得雨於夏末則更黃水盛而清口有倒灌之患其間晝夜卜度往來疇咨蓋不可屈指數矣因思淮之弱必其源之微或有沙石壅塞以致遏其流乎其時撫臣畢沅以辦理賑恤事宜不能分身往則命布政使江蘭往致禱淮瀆祠且相其源之形勢旣而江蘭奏淮瀆故有祠更有禹廟並得三大井於禹廟東引歸正河遂成巨川因具圖貼說呈覽朕觀其圖溪礧縈繆山林深秀所謂三泉者未必卽眞源也其時賑恤章程已

定乃命撫臣畢沅親往以窮其實茲畢沅親至胎簪山山頂遂得其淮源具圖以來於是導淮自桐柏之言始信蓋胎簪卽桐柏之中峯桑欽水經非誣也酈道元注以爲淮澧同源西流爲澧東流爲淮則今之分水嶺實在胎簪峯下按圖可求淮澧分流此又一證也夫天地之理豈易窮哉若據江蘭之奏定三井爲淮源則胎簪之真源湮矣然弗湮也桑欽酈道元之語固在也今偶湮之而後世必有執水經注以笑我君臣之不讀書矣茲不惟喜潰源之得真更以佳古人之用心勤而千載之下必有相知之人也江蘭向在部中爲能馳馬耐辛苦之能員是以屢升用之今職而於登峯造極跋涉以求得真源乃讓身軀孱弱佔畢之儒臣斯則在立心之堅定與不堅定及讀書與不讀書之分耳旣記其顛末並以嘉畢沅也沅其勉之○乙亥諭五十一年正月初一日日食業經

頒諭停止朝賀其救護典禮禮部遵例奉行朕仍於內殿恭設香案虔申祈禳以答 上天垂象儆惕修省之意至於下詔求言史冊所稱朕以爲轉涉虛文蓋事 天以實爲人君者敬 天勤民躬理庶務日慎一日乃職分所當然卽言官應行陳奏事件原當隨時入告何待日食然後求言況今每日御便殿聽政批答章奏大學士軍機大臣及九卿科道等不時召見諮詢政務卽外省自督撫至道府無不隨到宣召未至民隱壅於上聞詎因日食方始下詔求言耶至薄蝕天變日時度數有定昔宋仁宗康定元年正月丙辰朔應日食先是日官楊維德等請移閏於庚辰年則日食在前月之晦帝曰閏所以正天時而授民事其可曲避乎不許所見甚爲合禮蓋凡日食必以合朔移於晦日尤爲非是又考漢唐以來如光武帝建武二年北魏孝文帝延興四年太和十四年唐

太宗貞觀六年均以正月朔日食昔我皇祖時以康熙三十一年及五十八年正月朔日食且三十一年有錫伯瓜爾察達呼爾等來歸喀爾喀格楚爾喀亦以屬裔來歸之事可見日食爲定數而君人者則當因此益加戒懼至於以改移爲消弭之說則尤斷斷不可朕踐阼之始卽叩天默禱以荅蒙天佑享國至六十年卽當傳位歸政不敢如皇祖之數逾花甲今幸五十年來壽逾古稀康強如昔惟有宵旰勤求不遑暇逸以仰副上天眷顧之殷祖宗付託之重設以天變爲可消弭自於今歲歸政則是欲移咎後人圖卸己責如宋高宗年未六十傳位孝宗置軍國大事於不問不獨無以對天並無以對子朕豈肯出此乎從前推算天行度數乾隆六十年乙卯亦當正旦日食與今歲同若於是年歸政則值嗣子首歲元旦尤屬非宜朕心亦有不忍何若以是歲

爲朕臨御六十年頤和錫福之餘卽以次年爲嗣子迎庥改元之始國祥家慶天日重光以符朕首祚之祈以紹我大清億萬年之寶命不其懿歟然此願亦不敢期必總以惟日孜孜以靜俟上天垂佑耳將此通諭中外臣民咸知朕意

十二月丁丑諭御史富森阿條陳各款其言似是而於事皆斷不可行如所稱民間徵收地丁請兌收本色以準錢糧以代採買等語地丁錢糧款項紛繁俱有定例歷久遵行今欲以米易銀不特更張煩擾且地有肥磽米有貴賤一鄉一邑已各不齊如按例定官價則民間應交銀一兩卽須交米一石斷非所樂從而以時價折算則市集交易貴賤隨時又將何所折衷作爲定準轉啓官吏抑勒侵漁諸弊况各省地丁錢糧不下千餘萬兩若盡以易米堆積旣多陳陳相因必致紅朽此其事之斷不可行也又所稱勸民

捐輸社穀其穀石所值足敷捐納貢監之數卽予以貢監及報捐人員並恩准贖罪之人俱照監糧之例以糧准銀等語以糧准銀捐納貢監最易滋弊行之甘肅一省而王直望已構成大案今該御史竟欲各省踵而行之其流弊尙可問耶至所稱請禁止燒酒造麴及不准栽種煙草二事等語此二物固屬無益但煙草一項不特徧天下皆然卽外藩諸部亦無不相習成風燒酒一項雖爲糜費穀食而已爲閭閻食用所不可少況此項多係高粱並非米穀此二物民間藉以貿易圖利者不可勝數雖欲禁止而勢有所不能徒滋胥役藉端需索諸弊究於實政有何裨益該御史職司言路如果有關於國計民生之事原應據實直陳若似此摭拾浮詞毛舉細故不過如明季科道藉建白爲沽名其言雖若娓娓可聽而於政事無所補亦安用此條奏爲耶富森阿係旗人乃沾染

習氣愈趨愈下更屬不合亦不值將伊治罪但其識見如此迂謬豈可復勝御史之任富森阿本係員外郎改授御史著仍以員外郎用原摺擲還○乙酉諭盛京大城外八邊門用甎改砌○乙未續修大清一統志並遼金元三史國語解成○壬寅諭從前廣東督撫及粵海關監督每年進呈貢品俱令洋商採辦物件賠墊價值積習相沿商人遂形苦累上年欽派尙書福康安前往查辦將已延三等分別治罪明降諭旨嚴飭該督撫等嗣後不准呈進鐘表洋貨等物並嚴禁地方官向商人墊買物件以杜弊端今粵海關監督穆騰額奏稱該商等感戴恩施代爲呈貢物件但粵省洋商究非兩淮可比此次例進物件業已到京姑准留用外嗣後不准該商等再行呈進貢物俾商力益得寬裕至粵海關監督向不呈進貢物自德魁由如意館出任監督備物呈進李質穎等遂

相沿辦理第念該監督每年養廉不過二千五百兩辦公及家用外未必能多有餘貲不可與三處織造及鹽政養廉豐厚者比嗣後該監督亦不准備物呈進至該督撫及監督等不得因洋商見已停止進貢復藉端令其墊買物件致滋擾累以示朕體恤遠商之至意若日久廢弛故智復萌必重治其罪○諭軍機大臣等見因粵海關監督穆騰額代洋商呈進例貢已明降諭旨令其嗣後毋得再行呈進矣粵東洋商非兩准可比從前督撫監督因購買物件往往令該商等爲之墊辦致有賠累上年經欽差徹底清查後將巴延三等分別治罪並特降諭旨令該督等毋許復行呈進鐘表等物正所以杜藉端派辦之弊見在該商等備進物件亦經降旨停止原爲體恤洋商起見但恐該督撫等因商人停止進貢仍私令購辦物件致滋擾累尤不可不防其漸著傳諭富勒渾務

須嚴行飭禁留心查察毋得再踵前轍如該督等陽奉陰違經朕聞知或別經發覺必將該督等照巴延三等加倍治罪不能稍存姑貸也至該省向有發價官辦物件之事目今內府所存鐘表及洋貨等物儘敷陳設備賞之用若再爲採辦徒然堆積日多殊屬無謂並著該督等嗣後一併停止採辦其節省價銀逐漸累積卽可留供賑恤之費易無用爲有用豈不甚善設將來偶有需用之件原可傳令隨時購買於稅項下開銷也除俟孫士毅穆騰額到京面諭遵行外將此傳諭知之○是歲朝鮮來貢○會計天下民穀數各省通共大小男婦二萬八千八百八十六萬三千九百七十四名口各省通共存倉米穀三千九百一十七萬五千六百三十石五斗七升九勺

東華續錄

乾隆一百三

臣王先謙敬編

臣周瀚蕃恭校

乾隆五十一年丙午春正月丙午朔日有食之○戊申命戶部撥銀一百萬兩解往安徽備賑○庚申命順天府復行鄉飲酒禮○辛酉諭清口東西壩朕從前南巡親臨閱視所定水誌原爲平時湖水滿足而設至蓄洩機宜理應隨時通變視湖水長落尺寸以定拆收分數如遇湖水盛漲則急應拆展以資宣洩湖水消落則口門收束一丈湖水卽得一丈之益操縱在人節宣有制最爲良法前年九月以後湖水日漸消落薩載李奉翰卽應將清口兩壩酌量倍加收束豫爲蓄水地步乃意存惜費並不攔截收蓄以致清水益弱黃水倒灌停沙梗阻運道竟成淤淺不得已將湖水築

壩閉住借黃濟運乃係一時權宜可一不可再之舉此皆薩載李奉翰因循貽誤屢降諭旨甚明今清口東西壩既經酌量移建並將口門按照高堰誌椿酌定收束尺寸見在洪湖清水已據該督等具奏蓄至四尺二寸日來是否續有增長所蓄清水較黃水高有若干重運經臨啓壩放水時能否足以衝刷淤沙敵黃濟運著傳諭薩載等即將見在情形據實詳悉覆奏至將來湖水長落該督等務須隨時察看一遇清水漸消卽應將口門收窄以資瀦蓄毋再惜費貽誤將此由四百里傳諭知之尋奏開放太平河分注清水入運已將一月高堰誌椿仍存水四尺二寸未見消落通湖引河以外至臨黃處前經逐一測量河稍高仰處業挑成建瓴之勢所蓄清水見高黃水二尺五寸重運經臨開放通湖五道引河足以衝刷淤沙敵黃濟運報聞○姚成烈卒以彭元瑞爲禮部尙

書寶光殿爲吏部右侍郎

由宗人府府丞遷

○丁卯諭三阿哥之子縣懿

著晉封貝勒其出府事宜著交內務府總管照例辦理具奏○禮部侍郎莊存與內閣學士塔彰阿伯興俱以年老休致○庚午諭何裕城奏江西省市糧價值近日稍昂由江楚商民販運過多所致等語上年江楚等省被旱成災收成歉薄全賴鄰省米糧接濟商民均向江西四川等省販運糧石以資口食費朕許多苦心節次降旨令各該省督撫實力經理設法調劑務俾商販流通不至稍有阻遏方爲妥善今何裕城因該省糧價加增歸咎於商民販運過多是意存遏糴此何言耶民間遇有災歉自應以此省之有餘補彼省之不足爲督撫者皆當以民食爲心不分此疆彼界籌辦得宜俾得均勻接濟且鄰省到境採買小民等得價售賣可霑餘潤尙不應稍有居奇何況封疆大臣乃竟存彼此之見耶前據

李世傑奏因商販赴川卽碾動常平倉穀應糶所辦甚合機宜又據舒常奏江楚等省商民赴該處販買米石官爲照料令其迅速運回該督撫等皆能無分畛域辦理妥協是以將該督撫等議敘何裕城甫經到任何以卽有商販過多之慮甚屬非是何裕城著飭行○辛未定大考改部翰詹及小京官等分班補用例○甲戌以故和碩裕親王廣祿子輔國將軍亮煥襲封郡王

二月丙子諭州縣以上病痊服闋等官均不准捐免坐補原缺○

己卯轉陸費墀爲禮部左侍郎以藍應元爲禮部右侍郎由大理寺卿遷

○以扎郎阿僧保住爲內閣學士扎郎阿由太常寺卿僧保住由給事中遷○庚辰

上御經筵錫宴命工歌 欽定新譜抑戒詩歲爲例○辛巳諭嗣

後在京降革留任各官止停俸銀仍准支給俸米○壬午諭朕因

幾餘詠物有嘉靖年間器皿念及彼時嚴嵩專權煬蔽以致國是

日非朝多批政復取閱嚴嵩原傳見其勢燄薰灼賄賂公行甚至
生殺予奪皆可潛竊威柄顛倒是非實爲前明奸佞之尤本朝紀
綱整肅太阿從不下移本無大臣擅權之事卽原任大學士于敏
中因任用日久恩眷稍優外閒無識之徒未免心存依附而于敏
中亦遂暗爲招引潛受苞苴然其時不過因軍機大臣中無老成
更事之人而福隆安又年輕未能厯練以致于敏中聲勢略張朕
非不知而究之于敏中亦止於侍直樞廷承旨書諭不特非前朝
嚴嵩可比並不能如康熙年間明珠徐乾學高士奇等卽寵眷聲
勢亦尙不及鄂爾泰張廷玉安能於朕前竊弄威福淆亂是非耶
朕因于敏中在內廷供職尙屬勤慎且宣力年久是以於其身故
仍加恩飾終並准入賢良祠以全終始迨四十六年甘肅捐監折
收之事敗露王亶望等侵欺貪黷罪不容誅因憶及此事前經舒

赫德奏請停止而于敏中於朕前力言甘省捐監應開部中既省撥解之煩而間間又得難販之利實爲一舉兩得朕以其言尙屬有理是以准行詎知勒爾謹如木偶爲王亶望所愚遂通同一氣肥瘠殃民竟至釀成大家設非于敏中爲之主持勒爾謹豈敢遽行奏請卽王亶望亦豈敢肆行無忌若此是于敏中擁有厚貲亦必係王亶望等賄求賂謝種種弊混難逃朕之洞鑒若此案發覺時設于敏中尙在朕必嚴加懲治雖不至如王亶望等之立寘重典亦不僅予以褫革而已也因其時于敏中先已身故不加深究曲示矜全但于敏中如此營私舞弊朕不爲已甚不肯將其子孫治罪已屬格外恩施若賢良祠爲國家風勵有位昭示來茲盛典攸關豈可以不慎廉隅之人濫行列入朕久有此心茲因覽嚴嵩傳觸動鑒戒恐無知之人將以嘉靖爲比朕不受也于敏中著撤

出賢良祠以昭儆戒朕用人行政一秉至正大公從不稍涉偏私亦豈肯意存迴護前明嚴嵩之營私植黨嘉靖非無聞見第已用之於前不免迴護遂以釀成其惡朕甯受乏知人之鑒斷不使天下後世謂朕有爲于敏中始終蒙蔽之名刑賞黜陟彰瘡所繫賞一人而天下知勸罰一人而天下知懲是以不得不明白訓諭俾天下後世咸知朕意將此通諭知之○癸未諭前經降旨凡在京文武官員有降級革職留任者其應得俸米俱准照原品支領原所以體恤臣工且令京師米石流通俾民食充裕糧價亦得平減實爲兩有裨益第恐市僧逐利之徒一聞此信卽暫將米價減落以遂其賤買壟斷之私迨販糴入手又復囤積居奇米價仍恐不能平減是朕加惠臣工之舉轉爲奸商牟利之資其流弊不可不嚴行禁絕朕因米糧價值民食攸關凡可以設法調劑者無不豫

爲籌畫且商人亦係四民之一皆當激發天良改其壘斷惡習今
流風日下但知爲利無怪天時之不和朕亦愧誠感之不至道德
之未淳天下之商人皆當各發其天良而尤臨民之官所當加之
意者也此次曉諭之後若仍有奸販賤糶貴糶其情甚屬可惡者
著交步軍統領順天府都察院衙門嚴密訪拏處治以示懲儆其
通州近倉處所商販尤易居積並著一併嚴查飭禁此旨著通行
各督撫知之○甲申諭據大學士九卿等奏請續修會典一摺內
稱自乾隆二十二年命修會典後至今又三十年應重加編勒以
昭遵守等語國家之有會典昉之典謨官禮俾一代大經大法細
目宏綱無不瞭如指掌用以昭示法守而垂信來茲今大學士九
卿等合詞奏請重修係爲慎重典章起見其事原屬應行但朕御
宇五十一年仰承 昊蒼靈貺眷佑朕躬今雖年逾古稀精神如

舊默計自踐阼以來一切用人立政無時不以敬 天法 祖爲
念今幸版圖式廓海宇敕甯嘉與中外臣民共享昇平之福而朕
兢兢業業一心永肩終不以久而稍懈蓋所以迓 天庥紹 祖
烈也若以上屆重修會典後節年法制典章規模增廓卽爲編勒
成書固足以昭美備惟是從前節次降旨朕年八十六歲時卽當
歸政若果仰膺 天眷獲遂斯願誠爲國家延洪上瑞夫自古帝
王有父子內禪者非其君怠荒厭事卽其時事故相乘是以倉卒
授受之間略無典禮可採今國家正當全盛將來歸政時敕下禮
官詳議典禮一切祭 天告 廟受朝頒詔諸太儀實爲千古未
有之盛事甚鉅典也則當於是時重修會典將歸政典禮一併編
入俾我奕世子孫有享遐年而親相授受者得所遵循法守豈不
休歟所有大學士九卿等奏請重修會典之處此時且不必行至

各部院衙門前次會典告成後所有更改則例仍著各該堂官陸續另冊詳晰編輯以俟將來彙入會典將此通諭中外知之○乙酉 上幸南苑行圍○己丑 上還宮○庚寅石峰堡紀略成○辛卯諭昨據福崧奏浙省各屬倉庫虧缺之項爲數較多實難依限全補懇請分別展限並於新正傳齊司道各府公同立誓務期同心協力共砥廉隅等語所奏實屬不成事體各省倉庫錢糧自皇考世宗憲皇帝御宇十三年徹底清釐大加整飭將從前虧空積弊一槩消除各省庫項倉儲俱歸實貯朕御極以來雖間有不肖官吏侵欺貪冒者無不加以創懲蓋因 皇考一十三年整綱飭紀旋乾轉坤之力以充裕盈甯之天下付託於朕朕若不能隨時整頓稍涉顛頊是 皇考剔弊覈實之苦心至朕而竟有廢弛朕甚懼焉浙省地方向無虧缺之事四十六七年王亶望陳輝

祖貪贖之案相繼敗露經當勒運等將浙省倉庫虧缺之處據實奏明朕因該省王亶望陳輝祖之案甫經查辦不值更興大獄是以降旨令其勒限彌補已屬失之姑息該省大小官員自應激發天良上緊設法籌補乃歷三四年之久竟未彌補全完尙敢覲顏奏請展限且稱率同司道各府公同立誓尙復成何政體耶且浙省除王亶望陳輝祖之外未有勒索貪婪如國泰郝碩者卽王亶望之贖貨營私係在甘省侵蝕捐監銀兩而陳輝祖亦止於竊換官物並無如國泰婪贓肥橐派累各屬之事國泰在山東肆行勒派虧空至二百餘萬之多業據明興奏報於二年限內已經彌補全完浙省虧缺之數非山東可比何以立限已逾尙復宕延虧帑是該省大小地方官恃朕有不爲已甚之旨竟敢玩視帑項一味稽遲若以虧空止於倉儲一項伊等或藉口穀貴不及買補完足

已屬非是然其穀價銀兩自必存貯在庫斷無銀米兩無之理此而不嚴加懲創各省紛紛效尤伊於何底耶此事著派尙書曹文垣侍郎姜晟伊齡阿並隨帶司員馳驛前往浙省將各州縣倉庫徹底盤查究竟虧缺若干彌補若干或銀或米俱歸有著並將因何遲延不卽補足之處查明務使水落石出據實具奏所有富勒渾福崧奏到各摺暨福崧見奏摺片通行發鈔俾眾共知之○壬辰 上啓鑾謁 泰陵 泰東陵巡幸五臺○免經過地方本年額賦十分之三○甲午諭已入八分宗室公等均係寶石頂用藍韁似無區別著加恩已入八分宗室公賞用紫韁○丙申 上謁 泰陵 泰東陵○丁酉免直隸順德廣平大名三府屬上年災欠銀米○己亥吳垣卒以圖薩布爲湖北巡撫調秦承恩爲陝西布政使以英善爲湖南布政使同興爲直隸按察使

由刑部員外郎遷○

庚子諭湖北巡撫吳垣自簡任封疆以來操守謹飭辦事奮勉上年查辦災賑事宜實心經理茲聞遠逝深爲軫惻所有應得卹典著該部察例具奏尋予祭○諭此次所築營盤地面過於寬敞雖係動項辦理已覺徒滋糜費若地方官或因此有所賠墊則更無謂況此等地面卽係民田過事實廣旣於耕作有妨且輕用民力亦非所以示體恤嗣後該督等務妥協經理稱朕意焉○癸卯諭各省動用錢糧報銷經部駁查三次尙未題覆者俱交部議處著爲令

三月丙午 上駐蹕五臺山○庚戌諭軍機大臣等據福崧奏籌備柴塘歲修經費一摺稱每年柴工應需修費未便再動正項錢糧請將生息銀五十萬兩分借蘇局銅商及令浙商承領按年繳本息銀兩又據浙商請捐銀三十萬兩分年繳納歸還借帑以後

轆轤借發永爲柴塘歲修之用等語所奏殊屬不成事體浙省海塘工程原係朕意欲一律改建石工既可保障民生且可節省歲修柴塘爲一勞永逸之計昨於四十九年親臨閱視見章家菴一帶柴塘石塘之閒溝槽一道有存水特令填築堅實栽種樹株俾石塘柴塘連爲一勢卽以柴塘爲石塘之坦水意亦不必更修坦水也其范公塘一帶亦添建石工於內亦欲以舊有柴塘卽可爲坦水作重門保障不必更修也今看福崧等所奏是竟應仍每年修坦水不能一勞永逸以符前言轉深愧懣况改築石工後仍須常修坦水是前後費此千百萬帑金改建石塘竟係虛擲無用之地有是理乎朕於民生國計所關卽多費帑金原所不靳但旣建石塘復又須添築坦水歲修柴工是欲省有限之費而轉不免無窮之累卽云坦水柴塘亦爲衛護鱗工起見何若不修石塘之爲

愈耶此等無益之費日復一日伊於何底况商借商捐是欲便民而先以累商尤爲非計此事殊不可解朕前後思維實覺憤懣無可訓諭若果如福崧等所籌則是不必建此石塘當日何不於此批諭執奏以爲不可行徒多費乎且見在浙省倉庫虧缺迄今並未彌補全完是該撫所奏歲修經費之事總難憑信矣此事卽著交曹文植等於查辦虧空之便親赴該處會同地方官詳晰履勘將從前石塘是否當建及柴塘坦水如何又須添建歲修並福崧另摺所奏石料厚薄配搭成砌是否可行之處一併據實覆奏毋得稍有迴護曹文植等皆係曉事之人必能仰體朕意也將此硃批曹文植等攜與福崧看後卽由驛發往富勒渾看並令其明白回奏○辛亥 上回鑾○諭據薩載奏交春以來兩骸漸覺浮腫由於氣血兩虧今已多日尙未痊愈飲食漸減精神疲憊請解任

調理仍暫駐清江會同河臣料理河務等語薩載自簡任兩江總督以來辦理地方事務及河工一切皆爲奮勉正資倚任今聞患病深爲廕注已派御前侍衛阿彌達帶同御醫前往診視並賞大荷包一對小荷包二對以示優眷因思薩載從前挑挖運中河不知早建閘座以致水勢一洩無餘又於清口東西壩不能及早收束運道淺阻種種錯謬屢經訓飭指示該督且愧且懼心力未免勞瘁焦急該督因辦事錯誤經朕訓飭後能知愧懼尙有本心前曾有旨降爲三品頂帶今念其因此致疾仍著加恩復還原品頂帶令其安心在任調理以冀痊愈再李奉翰與薩載皆因籌辦河務未能妥協同時獲咎今薩載業經加恩李奉翰亦著加恩賞還原品頂帶該督務宜感激奮勉以觀後效至兩江總督事務關繫綦重所有總督事務著閔鶚元代爲辦理江甯等處地方皆係該

撫所屬閔鸞元或移駐江甯或卽在蘇州料理總督事務聽其自行酌便○諭軍機大臣等昨據福崧奏籌備柴塘坦水歲修經費一摺業經降旨令曹文植等會同地方官親往履勘將該處情形據實具奏矣浙省海塘工程關係民生保障甚重是以不惜千百萬帑金於老鹽倉范公塘舊有柴塘後一律添建石塘仍留柴塘爲重門保障既可衛護閭閻且可節省歲修爲一勞永逸之計昨於甲辰春南巡時親臨閱視見章家菴一帶石塘之前土塘之後留有溝槽一道中有積水並無去路恐石塘根腳勢必淹浸刷滲特令填築堅實並將柴塘後之土順坡填平於其上栽種樹株俾石塘土塘聯絡一勢卽以土塘爲石塘之坦水其范公塘一帶於舊有柴塘後一律添建石工亦以柴塘爲坦水俾作重門保障自無須另砌坦水也今據福崧等所奏似不修坦水柴塘將來海潮

衝刷或致浸損石塘不能永資鞏固是添築石工後仍須歲修柴塘坦水則前後所建石塘竟屬無益徒費千百萬帑金虛擲無用之地又曷若不修石塘止照舊歲柴塘坦水爲補偏救弊之計亦可以資抵禦之爲省便耶且富勒渾等如果真知灼見該處添建石塘後坦水柴塘亦難偏廢雖建石塘仍不能一勞永逸何不於彼時據實面陳朕亦豈肯復令續建范公塘石工又增無益之費耶卽云老鹽倉一帶工程係王直望陳輝祖等任內奏明辦理之事爲已成之局富勒渾等已屬知而不言而范公塘則係該督撫任內之事雖係朕意如此該督等身爲地方大吏果知其不可何妨當面執奏乃始而依違不言徒增此勞民傷財之舉今又欲歲修柴塘坦水亦應將必不得已之故直陳無隱方不負朕委任之意乃又迴護其詞託之商捐生息以飾其始終隱昧之咎朕反復

思維倍深愧懣昨雖有旨傳諭曹文植等令其親往履勘據實籌辦但恐曹文植等未會朕意猶或稍有迴護遷就之見著將柴塘坦水以及添建石塘究竟孰得孰失及見在必須發帑辦理方足以資鞏固兩有裨益之處熟籌妥議曹文植等務須親往秉公詳細籌畫據實具奏不得稍存諱飾也將此由六百里傳諭曹文植等並諭富勒渾福崧令其激發天良各抒所見具奏候朕另降諭旨○壬子諭軍機大臣等據書麟奏太湖縣唐家山地方鄉民掘挖蕨根見土內雜有黑米磨粉攪和好米煮食頗可充饑民人聞風踵至刨挖等語此項挖出黑米或係從前窖藏之物但唐家山地方並無民人居住或竟係天地生出以濟民食亦未可定該處既有此自然之利爲數較多恐遠近居民聞風刨挖以致攘奪紛爭亦所不免見在雖有該縣駐彼彈壓但必須妥協管束俾小民

既得藉資貧乏仍不至忿爭生事方爲妥善著傳諭該撫飭屬加
意彈壓勿令滋生事端並查明該處民人創乞丐時有無爭競滋事
之處據實覈奏尋奏太湖縣唐家山鄉民掘出黑米自正月十二
至二十七日共獲一千數百餘石時該縣在彼彈壓民無攘競嗣
因僅存雜土零粒卽已無人空掘得旨覽 御製誌事詩曰草根
與樹皮窮民禦災計敢信賑恤周遂乃無其事茲接安撫奏災黎
荷天賜空廩聊餬口得米出不意磨粉攪以粟煮食充饑致得干
餘石多而非村居地縣令分給民不無少接濟並呈其米樣煮食
親嘗試嗟我民食茲我食先墮淚乾坤德好生旣感且滋愧愧感
之不勝遑忍稱爲瑞郵寄諸皇子令皆知此味孫曾元永識愛民
悉予志○丙辰諭兩江總督薩載久任封疆老成練達河防宣力
懋著勤勞前因該督患病特遣御前侍衛阿彌達帶同御醫前往

診視以冀就痊茲聞溘逝深爲軫惜著加恩晉贈太子太保所有

應得卹典著該部察例具奏尋予祭葬諡誠恪○調李世傑爲兩

江總督以保甯爲四川總督

由成撫將軍遷

○戊午以李世傑於河工素

非諳悉命安徽巡撫書麟幫辦河務○己未

上至正定府詣

河神廟行禮○閏渚沱河○閏正定鎮兵○庚申豫親王修齡薨

予祭葬諡曰良○壬戌

上詣

堯母陵

帝堯廟行禮○甲子

諭賢良祠之建原所以覈其人品政蹟嘉予明禋風勵有位歷來

滿漢大臣有靖共夙夜敷歷封疆未經入祀者自應量爲增入以

示獎勵所有原任大學士徐本高斌伊犁將軍伊勒圖直隸總督

方觀承兩江總督薩載俱著入祀賢良祠○乙丑同興以不勝任

降補直隸霸昌道以託倫爲直隸按察使

由熱河道遷

○戊辰諭前因

柴大紀差弁齎摺屬令分日呈遞意存取巧恐於臺灣重地難以

勝任是以將該員調補汀州鎮總兵其臺灣鎮總兵以陸廷柱調補今柴大紀於生番滋事一案督率弁兵進山接剿頗爲出力且殲戮兇番甚多遠近番眾自必憚其威名聞風斂戢今甫經事定遽行更調恐非所宜柴大紀著仍回臺灣鎮總兵之任其汀州鎮總兵卽著陸廷柱調補朕用人行行政惟求公當不存成見也○軍機大臣等會同行在刑部議奏湖廣總督特成額奏湖北黃岡縣賊犯陳其方等行竊拒捕傷斃緝役陳其方擬斬立決同拒捕而未傷人之郭彥春照爲從例擬杖流陳其方應如該署撫所擬處決郭彥春情節較重請改發伊犁給厄魯特爲奴得旨此案竊賊陳其方拒捕殺人脫逃被獲自應如所擬卽行處斬其幫同拒捕並未傷人之郭彥春該署撫因係爲從之犯照例於斬罪上減一等問擬杖流經軍機大臣會同行在法司覈其情節較重將該犯

改發伊犁給厄魯特爲奴所擬甚是向例凡於拒捕爲從者俱於
爲首斬罪上減一等問擬杖流但爲從之犯雖同一拒捕而事主
之與官差究有區別如犯罪事發業經官司差人拘捕該犯仍敢
藐法抗拒較之事主追逐臨時抗拒者情罪自爲較重若槩以爲
從並未傷人一例減流不足以儆兇頑而昭法紀嗣後抗拒官差
爲從者卽照此案定擬其餘仍照舊例辦理著爲令○庚午 上
還京師○辛未諭前據福崧奏浙省各屬倉庫虧缺尙多難以依
限全補請分別展限並於新正傳齊司道各府公同立誓共砥廉
隅等語所奏殊不成話並恐該省竟有別項虧空情弊因命尙書
曹文植侍郎姜晟伊齡阿前往徹底查辦昨據曹文植等奏浙省
虧空據福崧等開報從前共一百三四十萬兩除已彌補九十六
萬餘兩未完三十三萬二千餘兩擬俟分投盤查再行具奏等語

浙省倉庫業經曹文植等委員先行盤查並親自抽盤虛實無難立見如查有別項虧短情弊自應將福崧等從重治罪卽無別項情弊該省虧缺自前次清查之後該撫等果能督飭所屬上緊籌備自當依限全完何至以巡撫而與屬員公堂立誓實屬不成政體此而得邀寬宥不特福崧覲顏留任莫知愧懼將來封疆大吏益復無所儆畏至盛住身任藩司錢糧是其專責於該省虧缺既不能督飭所屬依限全完又復隨同設誓亦不可仍留藩司之任福崧著來京候旨其浙江巡撫員缺著伊齡阿補授盛住著革去藩司留內務府郎中之職專辦杭州織造事務其浙江布政使員缺著顧學潮補授所遺直隸清河道員缺著朱濶補授浙江范公塘一帶改建石工尙未告竣此事原係盛住承辦應仍令監修以贖前愆○諭軍機大臣等前據福崧奏籌備柴塘坦水歲修經費

一摺業經降旨令曹文植等會同地方官親往履勘將該處情形據實具奏矣浙省海塘工程改建石工既可保障民生且可節省歲修柴塘亦無須採辦薪芻於民間更爲有益實屬一勞永逸之計前於四十九年南巡時親臨閱視見章家菴一帶石塘之前土塘之後有溝槽一道中存積水並無去路恐石塘根腳勢必淹浸滲刷特令卽取後層土備塘之土將溝槽填築堅實於其上栽種樹株俾石塘土塘聯絡一勢卽以爲石塘之坦水而此外復有舊有之柴塘柴塘之外又有舊有之竹簍是重重保障又何慮海潮之遽行衝刷至石塘耶况潮汐往來向有定候來急退速非如黃河伏秋大汎水長至數丈溜勢湍急逼近隄根晝夜射注者可比也若如該撫所言添築石工後仍須歲修柴塘坦水則前後所建石塘竟屬無益徒費千百萬帑金虛擲無用之地又曷若不修石

塘止照舊歲柴塘坦水爲補偏救弊之計亦可以資抵禦之爲省便耶至范公塘一帶本係土塘向厯多年並未聞衝塌之事今復於柴塘後亦一律添建石工卽以舊范公塘爲坦水足資重門鞏護更無須另砌坦水且海塘本設有塘兵卽使稍有坍塌塘兵卽應隨時修葺亦如京師步軍修理街道設有用費地方官不過略爲補苴乃福崧所奏竟須每年歲修柴塘坦水且籌及商借商捐欲每年生息五萬餘兩作爲歲修經費從前歲修柴塘每年報銷數千兩至二三萬兩不等今旣費此千百萬帑金改建石塘而歲修之費轉多於前此明係福崧受屬員慫慂爲將來浮冒開銷地步殊屬不成事體况福崧於屬員虧空不能依限彌補全完乃與屬員公同立誓有乖政體難勝封疆之任業經明降諭旨令福崧來京候旨將伊齡阿補授浙江巡撫矣總之浙省改建石塘後柴

塘坦水不加歲修十年之內朕可保安然無事伊齡阿既任浙江巡撫海塘是其專責不可不實心妥辦伊係內務府人員久任鹽政俸廉甚厚自必積有餘貲今既擢用浙江巡撫若再於地方鹽務內稍思染指不但不能承受朕恩並恐不能保其素有伊齡阿受朕委任伊尙明白曉事務須仰體朕意實力整頓以福崧爲前車之鑒也前於途次屢經降旨傳諭曹文植等令其親往履勘據實籌辦但恐曹文植等不能有一定主見有費周章著再傳諭曹文植茲示以大端伊等務須親往秉公詳細熟籌妥議據實具奏曹文植等皆係曉事之人必能善會朕意也至曹文植等接奉查辦海塘諭旨何以尙未將勘辦情形迅速覆奏前雖有旨令曹文植於查辦虧空海塘諸事完竣後回籍爲伊母祝壽但浙省盤查虧空既須逐細清釐而海塘事宜尤關緊要著傳諭曹文植務須

悉心籌畫一切查辦周妥覆奏後再行回籍即使稍逾伊母壽期於六月內回籍補祝多住數日亦無不可先公後私爲分所當然也將此由六百里傳諭知之○召劉墀來京以袁鑒爲江甯布政使虔禮寶爲山西按察使○癸酉以蘇凌阿爲工部右侍郎署吏部侍郎○轉藍應元爲禮部左侍郎以朱珪爲禮部右侍郎胡高望爲內閣學士

夏四月甲戌朔欽差戶部尙書曹文植等奏查勘柴石兩塘情形自章家巷西至范公塘一帶計工二千二百一十丈其間十段至十三段更當頂衝餘亦回溜直逼塘根非石塘不能永固應列爲急工其外衝之柴工更須透過石塘工尾往西接築二三百丈並於塘外添建挑水壩一座其范公塘西至烏龍廟一帶原砌石工二千九百三十丈查該處土塘一道高五尺至八尺底寬二丈五

尺至三丈五尺不等頗爲堅固塘外沙塗由烏龍廟起漲沙已寬至四百餘丈其迤東如三官塘等處舊漲熟地七百餘丈子沙又二百餘丈桑麻廬舍彌望相連爲潮汐所不能到應列爲緩工暫行停修再新建石塘若照老鹽倉以東舊有石塘一律修建坦水所需工料價銀不下一百數十萬兩未免過多應俟石工告竣之後卽以柴工爲坦水無須另建惟是老鹽倉西石塘坦水舊有歲修之例則作爲坦水之柴塘亦應一律籌辦此項銀兩卽於該省餘存項下銀六十萬兩內撥出五十萬兩酌借商人一分行息歲可得銀六萬兩專作老鹽倉西新舊柴塘歲修經費得旨所議是如所請行該部知道○乙亥諭軍機大臣等據曹文植等奏前往海塘詳細履勘公同商酌所議是已批如所請行矣但該處柴塘之外舊有竹篁裝貯碎石以爲坦水潮汐往來汕刷自不無坍塌

朕意該省每年若一律黏補柴塘則是閭閻日用所需柴薪未免
逐漸昂貴於民生殊有關繫今所議不過隨時墊陷加鑲所用無
多且坦水係竹簍裝貯碎石在在可以拾取事不勞而工易辦與
民生日用無涉更爲一舉兩得再從前歲修柴塘每年報銷不過
數千兩至二三萬兩不等今雖定以經費銀六萬兩伊齡阿仍須
督飭所屬據實報部覈銷年終彙奏不得因經費充餘致工員視
以爲例有冒銷侵蝕情弊至浙省虧空據曹文植等奏稱見在分
投前往各府清查此事若巡撫藩司未經離任或恐屬員等心存
瞻顧未肯和盤托出前已降旨令福崧來京候旨盛佳革去藩司
是撫藩皆已離任各州縣更無所容其迴護著傳諭曹文植等務
須切實嚴查並曉諭各屬令其據實呈明無難底裏畢露斷不可
稍涉顧預致有不實不盡至於浙省虧空福崧等既不能督飭所

屬及早籌補依限全完乃與屬員公堂立誓有乖政體雖已令其
離任將來定案時自有應得之咎此等倉庫虧缺各省難保必無
若不示以懲創相率效尤益復無所敬畏豈朕委任封疆整飭更
治之意耶此案俟曹文植等查明覆奏到日再降諭旨將此由六
百里傳諭曹文植等知之○丙子禮部奏酌定陪祀各氏後裔條
例一貢生准以本身應考職銜掣籤一武生俊秀俱准作監生一
奉祀生向准作恩貢究與考取者不同應改作監生一至聖裔向
止帶山東曲阜五人今添浙江衢州二人一元聖裔向止帶山東
東野氏二人今添陝西姬氏二人一有子裔向係江蘇崇明縣奉
祀生有氏帶領未爲允協應扣請以山東肥城縣有氏承襲博士
嗣後卽以博士帶領一朱子裔向係帶安徽婺源縣籍一人查福
建建安亦有額設博士應定爲婺源一人建安一人從之○己卯

命大學士阿桂往江南籌辦河工○乙酉諭據寶光鼎奏浙省各州縣倉庫虧缺未補者多蓋因從前王亶望陳輝祖貪墨繼踵敗露時督臣富勒渾僅以倉庫虧缺具奏並未徹底查辦止據司道結報之數渾同立限各州縣遇有升調事故輒令接任之員代爲出結辦理殊屬顛預聞得嘉興府屬之嘉興海鹽二縣温州府屬之平陽縣虧數皆逾十萬應查明何員虧缺若干分別定議指名嚴參等語所言皆屬公正浙省自王亶望陳輝祖在彼貪婪繼踵而其敗露則係監糧官物二案其時富勒渾福崧以合省倉庫虧缺具奏朕因不欲復興大獄准令設法勒限彌補已係朕格外之恩該省大小官員稍有人心自當及時彌補乃自立限後已屆五年而福崧仍以各屬未能彌補全完懇請展限具奏又復公堂設誓成何政體是以派尙書曹文植等前往徹底查辦昨據曹文植

等奏到該省虧缺倉庫自勒限彌補後尙虧缺三十三萬餘兩見在酌議清查等語是所奏與福崧等原報之數相符今據寶光鼐奏嘉興海鹽平陽三縣虧數皆逾十萬則是此三縣虧空已有三十餘萬其餘通省州縣虧缺自不止此數而曹文植等所奏合省尙虧三十三萬餘兩之處殊非實在確數似有將就了事之意而未喻朕不爲已甚去其甚之意也此事從前富勒渾等僅據司道結報之數渾同立限並未徹底清查而此時曹文植等到彼亦僅就福崧盛佳開報數目據以入奏看來曹文植等亦欲就案完事殊非令徹底清釐之意伊等係朕派委前往查辦自應將該省何處虧缺若干何處彌補若干何處竟未彌補何處不但不能彌補且有增多之處逐一詳查根究底裏方爲不虛此行若止就福崧等開報之數顛預結局則將來該省官員以倉庫虧缺爲前任之

事展轉推諉而不肖之員且以此挾制上司更肆其侵蝕伎倆將復成何事體且據寶光鼐奏嘉興海鹽平陽三縣每處虧數各逾十萬曹文植等卽當先就此三處徹底盤查更無難立見底裏曹文植等俱係公正之臣且伊齡阿已爲該省巡撫卽伊任內之事更不可爲之姑容隱忍致將來自貽伊戚也又據寶光鼐奏去歲杭州嘉興湖州三府秋收歉薄倉庫正需平糶而倉內有穀可糶者無幾浙東八府歲行採買惟折收銀兩以便那移等語曹文植等亦未奏及此也州縣設立常平義倉收貯穀石原爲偶遇荒歉臨時平糶散賑之用乃杭州等屬竟至無穀可糶而浙東採買且有折收銀兩之事尤堪駭異寶光鼐爲該省學政經朕批詢據實指陳必係耳聞目覩所奏不爲無據著將原摺抄寄曹文植等閱看令其查照寶光鼐所奏各款逐一秉公詳細盤查務將該省數

年積玩虧缺實數及原虧續缺裝點各情弊並虧空數逾十萬之
嘉興等縣又平糶無穀折銀那移之杭州浙東等屬逐一查明據
實嚴參辦理儻曹文植等仍有迴護瞻徇不實不盡將來別經發
覺朕惟伊三人是問恐曹文植等不能當其咎矣著由六百里速
行傳諭曹文植等並令速行回奏官勒渾福崧各令其明白回奏
外將此通行傳諭知之○壬辰諭四庫館進呈八旗通志一書朕
詳加披閱其忠烈傳提要內詳載開國以來 列祖 列宗褒獎
功勳風勵忠節之典而於乾隆年間恩卹諸大政俱闕而不載如
八旗陣亡官員世職襲次已完朕特降恩旨賞給恩騎尉世襲罔
替而綠營官員陣亡議卹之例止得難廕一次非奉特旨加恩不
能得有世職昨年降旨凡陣亡人員無論漢人及旗人之用於綠
營者總與旗人一體給與世職卹襲次已完亦照例給恩騎尉俾

得賞延於世蓋以官員等力戰敵愾效命疆場其義烈實堪嘉尚
是以特沛殊恩使其子孫永承恩澤懋答前勛甚盛典也乃通志
內竟未登載則將來此書之傳何足以羽翼國史昭示來茲再志
內所載壯尼大卽護軍校他如昂邦章京阿思哈尼哈番之爲子
男阿達哈哈番之爲輕車都尉拜他拉布拉哈番之爲騎都尉拖
沙拉哈番之爲雲騎尉雖不便擅改原文亦當加按注明或請朕
指示使後人開卷曉然方爲傳信豈多人無一思及此但知遷延
其事以爲領桌飯之計乎是鈔史非修史矣前因遼金元三史人
地名原文俱係當時國語而後之修史者不諳文義率以不善語
言爲之譯寫是以數年來特命館臣按照各史不改其事但將語
言詳加改正鋟板重修遂使當時名爵山川瞭如指掌今以本朝
之書乃止仍原文開載不爲分晰注明開列凡例以定章程是爲

前史盡心改正而於本朝反不經意不幾貽笑將來傳疑後世辦理太屬疏漏此書著交軍機大臣會同該館總裁重加輯訂詳悉添註加按進呈候朕閱定後再將文淵等閣陳設之書一體改正所有承辦此書之總裁及纂修等俱著逐一查明交部議處○丙申諭我朝中外一家蒙古各扎薩克俱爲臣僕效惻抒忱歷有年所朕恭閱 聖祖仁皇帝實錄康熙五十二年有鄂爾多斯請於察罕托輝之地暫行遊牧遣尙書穆和倫等前往勘明以黃河東西定界一事此卽如內地之鄉里小民貪得便宜控爭阡陌無關緊要而總兵范時捷張大其詞形諸章疏遂若有越界爭占之事鄂爾多斯遊牧之地卽係前明河套處所恐彼時無知之徒未必不疑有如明季河套故事者然一經指定疆界直至今數十年永遠懷遵至乾隆四十九年陝甘總督福康安奏稱該處黃河改向

西流原在河西民人反在河東鄂爾多斯蒙古貪利濫以見行黃河爲界謂民人占據伊等遊牧地方呈控隨派侍郎賽音伯爾格圖前往履勘仍照從前所定黃河舊流之地爲界釘椿立碑辦理完結鄂爾多斯蒙古等俯首遵依可見此等事件原如內地百姓互爭隴畝細故並非若前明之河套爲末季邊疆構釁失算者之可比也朕閱及此因恐無識不諳外藩情形之徒未能深悉其故妄生疑議特此明白宣諭俾眾共知之○以趙鐸爲工部右侍郎張若淳爲內閣學士由左副都御史遷○己亥富勒渾緣事解任以孫士毅兼署兩廣總督○辛丑諭軍機大臣等據阿桂等奏見在濟水未旺所有張福口等處引河遵旨暫行堵閉其王營減壩今歲必須開放但應在湖水大長之後方可不煩再舉並擬將雲梯關下二套地方開挑引河於大汛時開放改作海口更可得久遠之利

等語雲梯關外旣已漲成沙地海口距關甚遠以致下游壅阻黃水倒漾勢不能不爲改圖今關外二套地方爲北潮河歸海之路形勢較爲徑捷若開挑引河於大汛時開放或能衝刷寬深黃水竟行全掣由茲東注則相距海口較近自屬最便亦止可如此辦理但朕所慮者不在清口而在高家堰蓋盈虛消息理有固然黃水清水強弱情形往往迭爲消長連歲黃水盛漲清水弱極將來清水必有旺盛之時高堰所關非細恐李奉翰等狃於年來清水弱小於高堰一帶隄防工段或稍存大意設遇清水盛漲猝不及備尤不可不豫爲慮及不可拘於蓄清之說也阿桂將此切屬李奉翰務須先事熟籌公同商榷慎之又慎毋致臨時周章方爲妥善至見在二套地方開挑引河黃水多一分洩之路自可暢達下注但將來衝刷寬深後若無隄防關束恐大汛盛漲時河流散漫

水緩沙停仍不免有舊時淤墊之處阿桂等不可拘泥惜費之見應詳晰察看該處情形相機妥辦以爲久遠萬全之計將此由六百里傳諭知之

五月丙午命阿桂赴浙會同曹文植等查辦虧空並履勘海塘○庚戌諭軍機大臣等據何裕城奏晴雨農田一摺內稱江右往歲不乏春膏如今春之雨晴相閒不少不多爲近年所罕有何其言之夸也江西省節年以來雨水均屬調勻不聞有缺雨之事乃何裕城到任未久輒謂今歲春膏爲往年所罕有竟似伊甫經蒞任卽能感召天和則該撫前在河南巡撫任內衛輝一帶旱熯頻仍何以獨不能感召天庥早邀渥澤耶此等語句不過屬員填砌具稟取悅上司該撫卽據以入奏而不知其夸飾過當何裕城平日居官尙屬小心謹慎操守亦可但聞其不能振作有爲屬員不知

畏懼封疆大吏固不可擅作威福若一味柔懦則地方事件日久必致闕茸何裕城當慎之戒之不可因該省向來晴雨應時遽謂無事輒生耽逸自滿之意益當諸事留心將此傳諭知之○以劉權之爲左副都御史出大理寺卿遷○丙辰諭前據孫士毅奏富勒渾家人殷士俊等有招搖婪索之事降旨將富勒渾解任令舒常會同孫士毅秉公審究並諭四德長麟將殷士俊蘇州原籍家產嚴密查抄茲據四德等奏前赴該犯住居常熟地方於住房內查出見存並借出銀錢共二萬餘兩田六百三十餘畝房屋三所並起出殷士俊之子殷孝基捐監部照一張等語殷士俊以微賤長隨擁貲數萬且父子蒙混捐納濫膺頂帶計其一切貲財俱係跟隨富勒渾爲長隨後所得富勒渾若果無知情故縱聽其乞恩浸潤之事則其伎倆止於如部中書辦詐騙招搖地方官吏見其久而不

靈斷不肯多給銀錢豈能積貲累萬蓋各部書役遇有案件往往設計撞騙然所得者無多亦斷不能顛倒是非作奸飢法計其家私積至千百者容或有之斷無積累鉅萬之事且朕日理萬幾常在朕前使令之總管太監奏事太監輩如伊等欲婪索銀錢必須積壓外省文報奏摺或於朕前揣探意旨假作威福方能婪得厚貲今之總管奏事太監等不過藉每月錢糧養家餬口其家貲之至多者或不過千金從無與中外官吏結交招搖之事朕爲天下主尙不肯假手近侍任擁厚貲乃殷士俊不過跟隨總督之長隨積貲竟如許之多必係平日屬員中有託其營求升調富勒渾曲意聽從或勒索不遂富勒渾卽不假辭色該犯有所恃而不恐始敢恣意勒索而屬員中因其貲緣有效觸忤蒙愆相率送給銀錢是以數年以來乃至擁貲累萬父子俱捐納頂帶官職且該犯於

富勒渾在藩司任內始行跟隨及爲工部尙書伊卽辭去至四十五年富勒渾復爲湖廣總督伊又跟隨前往反覆狡獪昧盡天良富勒渾何所取而受其愚弄一心委託耶覈其情罪較之從前安甯家人李忠更屬可惡若謂富勒渾於該犯如此婪索竟同木偶若罔聞知夫誰信之此卽童穉尙不可欺安能逃朕之洞鑒乎卽此一節富勒渾之罪已不可追富勒渾著革職若此時孫士毅已另行審出別項情節發交阿桂等辦理孫士毅接奉此旨卽派委妥幹道府大員將富勒渾解往浙江交與阿桂等秉公嚴訊審辦至富勒渾到粵未久殷士俊所得銀錢必係在閩浙地方勒索者居多著阿桂等就近徹底查究據實定擬具奏毋得稍有徇隱再昨廣東右翼鎮總兵施國麟來京陛見朕面加詢問復令軍機大臣詳詢據稱富勒渾縱容家人及家人李姓狂妄滋事等語並將

原詢奏片發交阿桂等閱看歸案質審著將此旨由六百里傳諭
阿桂孫士毅等並令舒常毋庸前赴廣東卽赴浙江會同阿桂等
審辦將此通諭知之○諭軍機大臣等據富綱等奏遴員督辦甯
臺廠務及富綱奏滇黔兩省春收豐稔情形二摺富綱前在福建
巡撫任內辦理地方事務未見認真及擢用總督以後辦事亦復
懦弱經朕屢加訓飭尙知奮勉近年趨辦銅斤皆能依限開幫並
無貽誤劉秉恬歷任巡撫其初到雲南聲名甚屬平常近聞伊能
遵朕教誨痛自改悔無似前聲名平常之事而於辦理銅鹽諸政
亦能迅速妥協督撫大吏身任封疆總應潔己奉公實心辦理期
於無忝厥職該督等果能事事留心改過從善豈惟伊等之福且
亦朕之福也似此方能長荷朕恩而朕亦實不願伊等有飢法營
私之事近因富勒渾家人殷士俊等有招搖婪索等事查抄該犯

家產貨財竟至數萬若非富勒渾知情縱容家人等斷不敢恣意
婪賄若此見已降旨革職解赴浙省交阿桂歸案審辦可見天理
昭彰督撫等一有味良玩法情事無不立即敗露朕亦不能爲之
曲加寬貸富綱等務須慎之又慎卽以富勒渾爲前車之鑒蓋劉
秉恬應慎之在己持之以久而富綱尤應慎在家人以富勒渾爲
戒庶不負朕教諭成全諄諄誥誡之至意所有本日硃批富綱等
摺亦著伊二人同看將此由五百里諭令知之○丁巳諭今年派
出後撥隨圍章京人員看射布靶時文官內多有捏稱患病臂痛
不射者伊等雖屬文員但係旗人豈可在朕前推故不射此風斷
不可長若不嚴加禁止久則漸染漢習竟至忘失滿洲本來技藝
矣此次推故不射人員著交各該衙門存記下次京察時不准列
入一等著爲例○諭昨因四德等查抄富勒渾家人殷士俊貨財

累萬富勒渾顯有縱容照應情弊已降旨將富勒渾革職解赴浙江交阿桂等歸案秉公審辦矣富勒渾久任封疆受恩深重前於舒常回京陛見時詢及富勒渾居官若何據奏操守實不能保及穆騰額來京陛見復加詢問所奏與舒常相符是以密降諭旨令孫士毅訪查據實具奏旋據孫士毅奏到富勒渾長隨股士俊等在外婪索招搖富勒渾不能約束當即降旨將富勒渾解任候質及四德等查抄股士俊原籍貲財銀錢累萬其爲富勒渾縱容婪索情弊顯然是以將伊革職解赴浙江審辦是此案之敗露雖係孫士毅訪查具奏而其實始於舒常繼以穆騰額並非孫士毅首先舉發孫士毅經朕降旨嚴切詢問焉敢復顧情面不行據實直陳以避舉發之名自取重戾乎設此案先爲孫士毅所舉發朕亦不肯卽以原參之人畀以被參之缺致啓攻訐之風今此案係舒

常穆騰額先後陳奏朕兼聽並觀原不以一人之奏卽斥棄大臣亦不肯任大臣等營私聲名狼藉置而不問爲保全也且孫士毅承朕密諭是以查參究辦原屬秉公所有兩廣總督員缺卽著孫士毅補授仍暫兼署廣東巡撫今春孫士毅進京陛見時曾面奏粵東水土潮溽與病體非宜情願留京供職屢次懇切乞恩但見在之人孫士毅自當勉力任事俟朕將來酌量得人時再行更調其廣東巡撫員缺著圖薩布調補李封著補授湖北巡撫其蘇州布政使員缺著長麟補授特成額著來京陛見其湖廣總督印務著圖薩布留彼暫行署理李封著卽赴湖北新任至廣東巡撫見係孫士毅兼署圖薩布俟特成額回任後再赴廣東新任並將朕用人苦衷明諭中外知之○以陳守訓爲江蘇按察使

由山東濟東道遷

○己未以李侍堯署湖廣總督○辛酉諭軍機大臣等據寶光鼐

奏盤查過嘉興桐鄉海鹽等六縣倉穀有缺穀數百石及百餘石者隨飭該府轉令各該縣按數補足惟桐鄉縣倉內實無儲穀所有之穀乃借自社倉又借米三千石開報平糶掩飾一時嘉興縣社倉空虛呈控紛紛是該二縣社倉辦理皆不妥協並據曹文植等奏前赴紹興杭州所屬各指出一二廢盤斛其餘按廢籤探丈量折算惟山陰嘉興縣多穀十三石此外各縣廢口俱有短少自一二石至五六石不等各等語著將原摺鈔寄阿桂閱看到浙後即將寶光鼐所奏各條款與曹文植等逐一覈辦如各該縣果查有侵那捏報情弊自應據實嚴參辦理又寶光鼐所奏塘工經費宜責成塘工大員督率海防同知承修一節是否可行亦著交與阿桂於履勘海塘後一併酌議覈辦至所稱於沙灘地栽種蘆葦三年之後將不可勝用遇有衝刷處所卽以葦易柴塘工愈加緊

牢等語則所見殊屬迂謬按之事理不通之極海水性鹹不能生
物是以沙灘餘地棄而不用若果可以栽種蘆葦民間豈有不早
行栽種聽其閒曠之理朕屢次巡幸浙江鑒輅所經亦並未見有
葦田且蘆葦易於糟爛不比柴性之堅勁若用以鑲築塘工豈能
鞏固經久或竇光堃別有所見可備採擇之處阿桂等務須悉心
商榷據實具奏不可稍存迴護將抵浙後會同曹文植等訊辦各
情節迅速具奏將此由五百里傳諭知之○癸亥以王兆棠爲江
蘇按察使

由糧道遷

陳奉茲爲四川按察使

由建昌道遷

○庚午諭朕簡任

封疆向來由旗員中擢用總督者如黃廷桂尹繼善高晉薩載等
皆能實心任事著績宜猷爲封疆得力之人十數年來總督中富
勒渾資格較深歷練亦久在近來總督中上之列是以由閩浙調
用兩廣委以海疆繁劇重任方資倚毗今春舒常回京於途次召

對詢各省督撫聲名舒常卽稱富勒渾操守平常朕猶意舒常甫離兩廣總督來京或不免意圖復任移動富勒渾以爲觀覲回任地步因疑信兼半及穆騰額來行在陛見復經面詢富勒渾居官辦事如何伊止言見在總督中操守可信者惟李世傑薩載而已至於富勒渾之操守不敢深信因命軍機大臣詳加詢問方將伊家人長隨在外居住招搖生事情節說出而於如何受贓舞弊之處亦無指實朕意彼時舒常若尙扈從行在彼此會晤相好或有先入之言穆騰額隨同附和亦爲事之所有然其時舒常早已於臺懷卽派往陝西查辦案件並未與穆騰額謀面而該監督奏對之語與舒常不謀而合則其言似非無據始密諭孫士毅據實查奏卽孫士毅今春來京陛見時亦從未奏及富勒渾之聲名操守平常也嗣據孫士毅遵旨查奏富勒渾實有縱容家人殷士俊等

在外招搖滋事之處猶以富勒渾不過身同木偶止失於約束家人未必有知情染指之事俟訊明定案後將富勒渾予以薄懲將來尙欲令其戴罪自贖更換福康安陝甘之任尙不疑其有貪婪侵隱劣蹟也今據孫士毅節次查奏則富勒渾竟與殷士俊等關通婪索贓蹟疊疊如殷士俊李士榮聽從吳胡氏陳通照屬託照應得受花錢及派洋商分買人蔭購買鐘表等物浮買價銀短發價值等事卽云該家人等營私舞弊富勒渾漫無覺察已屬形同木偶乃富勒渾因點派各口岸令書役等攤繳銀一萬九千六百餘兩交進督署又因應解河南充公銀二萬兩暗令督標千總楊中興等潛赴福建向省城道員衙門支取解豫是富勒渾一則先侵後吐一則身已離閭尙有私囊存寄其操守果不可問矣前已降旨將富勒渾革職令孫士毅詢問確實解往浙省交阿桂等歸

案審辦乃富勒渾心疑舒常孫士毅穆鵬額等有心傾陷於孫士毅傳旨詢問時疑怒交作其忿戾之氣形於詞色且於解任後並不自知悔懼靜候質訊猶復以從前案件嘵嘵置辨並因署南雄府孔繼棟於孫士毅查辦殷士俊贓款時將富勒渾幕友行李截留心懷嫌恨欲將孔繼棟另案參革經孫士毅札阻不允竟以解任之後單銜具奏且於事已發覺將勒派各口岸銀一萬九千餘兩交監督衙門解京以掩飾其先侵後吐之迹且其信任家人李士榮等開通說合聲名狼藉卽大學士嵇璜學政寶光堽總兵施國麟眾口一詞是孫士毅查奏各情節實係遵奉諭旨秉公查辦確有證據之事並非有意吹求而富勒渾受朕深恩種種情節殊出情理之外此皆由富勒渾孤恩昧良天奪其魄是以所爲顛倒錯亂自速其罪乃至如此朕從來不肯存逆詐億不信之見而不

有者營私執法自然敗露朕亦不能稍爲曲貸此實朕用人不得已之苦心中外臣工所共見共聞然朕細思之爲大臣而受家人之累者不少而惟旗人更多卽如福隆安家人富禮善毆命頂兇一案福隆安心存庇護經朕特派大臣審明將富禮善抵法並將福隆安治罪此亦福隆安平日不能管束家人致伊等恣意妄爲自蹈法網累及伊主並致家遭回祿身亦短折可見此輩宵小奴隸獲罪於天福善禍淫之理捷如影響其實欲庇護家人適足自貽伊戚而藐法家奴仍致自罹大辟福隆安幸而在京供職近在輦轂之下是以敗露旋踵若使擢用外任則富禮善之恣縱妄爲豈在殷士俊等之下而福隆安之受其累者亦未必不如富勒渾之甚而朕亦不能曲護也特此明白宣諭內外大臣嗣後務須正躬潔己嚴肅馭下當以前事爲戒設有不知儆懼仍蹈覆轍當事

情敗露之後朕必不肯僅令罪坐奴隸置家長於不問而爲家主者亦何所愛護而輕以身家爲奴隸計耶將此通諭中外知之○辛未 上啓鑒秋獮木蘭○諭據畢沅奏豫省連歲不登凡有恆產之家往往變賣餬口近更有於青黃不接之時將轉瞬成熟麥地賤價準賣山西等處富戶聞風赴豫舉放利債藉此準折地畝貧民已經失業雖遇豐稔之年亦無憑藉見在飭屬曉諭勒限報明地方官酌覈原賣價值分別取贖毋許買主圖利占據等語所奏實屬可嘉豫省頻歲浮饑閭閻元氣消耗全賴業農之民家有恆產一遇豐年口食即可充裕乃山西等處豪強富戶越境放債賤準地畝且將麥收在望之田乘機圖占一經準折卽據爲己有此更酷於王安石之青苗矣似此乘人之危以遂其壟斷之計其情甚爲可惡各省黎元何一非朕之赤子今因河南災旱而山西

富戶乘以爲利是富者日益其富貧者日見其貧及遇豐年展轉增價售賣而中州元氣竟爲隔省豪強兼併剝災區氣象何由得復舊觀將來豫省貧民日漸流徙田產皆爲晉民所有成何事體此事關係民生衣食根本畢沅籌辦及此實屬留心民事但摺內所奏猶有未盡周到之處若非明降諭旨嚴定章程恐地方力量有所不及而爲富不仁者尤無所畏懼仍屬有名無實此事著交畢沅率同江蘭悉心籌畫飭屬詳查此等賤買賤賣之田覈其原價勒限聽原主收贖其連麥準價之地仍令原主收回刈割除原價歸還外酌量給與一二分利息毋許賣主圖利占據不能給贖致失業之民有歲無田坐聽豐年枵腹儻有財力不贈不能給與本利同贖者在買主已獲厚利自當於本利十分之中酌減三四分聽贖方合人情天理該富戶等同爲朕之子民亦當各具天

良乃視人之饑寒以爲厚利以天理論之豈得長享富厚甚可畏也但遽繩以法朕亦有所不忍經此次降旨明切諭勸之後儻伊等仍思牟利不放原主收贖或勒取重利不肯減價則是圖利之民怙終不悛一經查出必當寘之於法勿謂朕不教戒也畢沅接奉此旨卽多行榜示通衢僻壤使眾共聞知至地方官查辦地畝儻有不肖書役吏胥於中藉端勒索滋擾閭閻以致富戶貧民兩受其累則是該撫等辦理不善一經發覺除將本人嚴行懲治外必將該撫藩等一併治罪畢沅江蘭務宜實心籌畫妥協辦理以副朕惠愛一方災黎調燮變通之至意

六月乙亥諭富勒渾之子內閣侍讀查隆阿著革職尋交刑部○
丁丑 上詣熱河 文廟行禮 上駐蹕避暑山莊○乙酉諭前經阿桂等查明浙省虧空已未彌補實數詳覈定議並請將雅德

福崧等交部嚴加議處一摺已交軍機大臣會同該部議奏矣浙省虧空一案大局已定所有倉庫彌補未完銀二十五萬三千七百餘兩與福崧初報二十七萬餘兩之數有少無多足見其尙無隱飾至福崧在浙江巡撫任內若有別項劣蹟寶光彙必形之章奏況阿桂等在彼查辦日久如有所聞亦必據實參劾看來福崧尙無貪黷敗檢情事其咎在於不能實力督催以致逾限不完已失之柔懦又復公堂設誓有乖政體其過尙輕自有應得之罪俟定案後另降諭旨外見在伊桑阿丁憂其山西巡撫員缺著加恩暫令福崧前往署理伊亦無顏見朕不必前往熱河請訓卽由京速赴新任此後務當益加感奮諸事實力整頓儻再因循玩愒朕必將伊加倍治罪不能邀寬典也勉之慎之○戊子諭軍機大臣等前據曹錫寶奏和珅家人全兒服用奢侈器具完美恐有招搖

撞騙等事一摺已交留京王大臣等查辦矣曹錫寶如果見全兒倚藉主勢有招搖撞騙情事何妨指出實據列款嚴參乃徒託諸空言或其意本欲參劾和珅而又不敢明言故以家人爲由隱約其詞旁敲側擊以爲將來波及地步乎或竟係紀昀因上年海昇毆死伊妻吳雅氏一案和珅前往驗出真傷心懷仇恨嗾令曹錫寶參奏以爲報復之計乎此乃朕揣度之意若不出此則曹錫寶之奏何由而來著留京王大臣詳悉訪查詢問務得實在情節朕於此案總期根究明白並非因此一虛言欲治和珅更非欲爲和珅開脫留京王大臣等不可誤會朕旨將曹錫寶加以詞色有意吹求使原告轉成被告亦無是理務須平心靜氣虛衷詳問如曹錫寶果能指出全兒借端撞騙款蹟訪查得實卽一面從嚴審辦一面據實具奏不可因和珅稍存迴護若稍存迴護是乃陷和珅

且自陷也又據和珅稱家人全兒已到熱河會面加詰問伊供不
但從不敢招搖滋事交接官員卽所謂房屋寬敞器具完美容或
有之亦非可挾以出外之物我於曹御史名姓素未聞知彼又何
從進宅目覩等語雖係一面之詞亦尙近理曹錫寶身爲言官必
不至下交奴僕其車馬衣服尙可云遇諸途路至房屋寬敞器具
完美非身臨其地何能知悉乎至全兒代伊主辦理崇文門稅務
有年稍有積蓄蓋造房屋數十間居住亦屬事理之常從前及見
在內外大臣家人中似此者恐亦不少若無似殷士俊等之有真
贓實據槩以車服房舍之故查拏治罪則在京大臣之僕安得人
人而禁之且必人人側足而立亦斷無此政體設或全兒在崇文
門代伊主經管稅課於額稅之外私有加增苦累商民以肥私橐
縣恩籤派番役一經訪查更無難得實據王大臣等嚴行察訪全

兒並無生事款蹟而曹錫寶徒入無根之言遞行陳奏以博建白之名朕又何能以空言遽入人罪乎將此由四百里諭令留京王大臣等並令紀昀知之即將查訊情形先由四百里馳奏不必俟本報之便○庚寅諭留京辦事王大臣等奏傳詢御史曹錫寶所有參奏和珅家人全兒車服房舍一摺據曹錫寶稱我與和珅家人全兒向來從不認識卽伊在崇文門管理稅務我亦並不知道伊於額稅之外有無擅自加增及別項情弊亦未有人說過我因聞全兒住屋服用甚是完美於路過興化寺街留心查看見其房屋甚是高大我想伊係家奴焉有多貲造此華屋恐有借主人名目招搖撞騙之事是以具奏等語曹錫寶旣云全兒情弊從未有入說過又未親到伊家何以又稱聞全兒住房服用甚是完美究竟聞自何人必有著落若非有人說過則曹錫寶何以知全兒住

在興化寺街而經過時卽留心察看况京城內外大街小巷房屋甚多御史又無逐戶查問之理若非中有成見何以獨於全兒住屋如此留意耶看來該御史意欲參劾和珅而又不敢明言故爲此奏隱約其詞以爲旁敲側擊之計及傳旨詢問則又遁詞掩飾不自覺其自相矛盾殊不知朕辦理庶務於是非虛實總須徹底究明從不肯顛預完結示人疑案著留京王大臣等再行詳詢曹錫寶如果和珅有營私舞弊款蹟不妨據實舉出朕必質詢明確如果得實不難將和珅治罪仍著王大臣令將全兒滋事不法之處究竟聞自何人據實明言毋再任其狡飾至天下各處關樞不免皆有羨餘况全兒代伊主辦理稅務多年稍有積蓄蓋造房屋數十間亦屬人情之常見在內外旗員大臣中如阿桂福隆安福康安德保豐紳濟倫金簡李質穎伊齡阿承安等或久居顯要或

游歷封疆或曾任鹽樞或家本充饒其管事家人住屋如全兒者諒亦不少卽承安家之管家安政亦未聞康熙年間有以家貲富厚參劾者著都察院堂官並合縣恩派步軍統領衙門司官一員帶同曹錫寶先至全兒家看視住屋究有若干並告以不過履勘房屋並非查抄家產不必疑畏儻伊家有高樓廣廈儼同府第之處卽其罪案若不過照常齊民房舍稍覺整齊亦難律以專條再至阿桂等管家及用事家人住處周歷查看並傳諭各家主僕告以此故不必心存畏懼如各大臣家人住居並無如全兒之多卽治以越制之罪伊亦無從置喙若阿桂等各家管事家人住房有比全兒多且大者則當詰詢曹錫寶何以轉不參劾之故一經比較情僞立見且如揚州鹽商皆係平民因擁有厚貲其居室園圃無不華麗崇煥卽安瀾園寄暢園等處雖云係爲朕巡幸而設非

伊等之產而何而山西富戶百十萬家貧者不一而足亦豈得槩以華侈富厚而罪之乎朕任用大臣等辦事而大臣等亦不能無驅使之僕若無似殷士俊等之招搖滋事實據真贓而第以睚眦浮言遽將中外大臣家人槩行查拏治罪有是爲政之理乎將此通諭知之仍著留京辦事大臣等將察看詢問情形卽行由驛覆奏○辛丑諭富勒渾久膺簡畀歷任封疆方資倚毗初不料其縱容家人恣意婪索又開口勒派銀兩先侵後吐款蹟纍纍實屬昧良負恩朕於春間曾經密諭雅德將富勒渾在任操守若何有無家人在外滋事之處令其密查覆奏乃雅德不但不能據實查明而且力爲保奏伊豈不見諭旨內有並諭孫士毅詳查之語能保不別處發覺而竟甘心徇隱此其面欺之罪已百喙難辭及富勒渾諸事敗露雅德方覺從前保奏之非卽以汀州鎮總兵武隆阿

在任七年廢弛營伍嚴行參奏以顯其諸事留心爲救過見長地步因查閱伊去歲所奏福建省總兵考語單內稱武隆阿實心任事營伍整肅今以該鎮在任七年廢弛怠玩參奏不自知其自相矛盾是其所爲顛倒錯亂止圖補過一時而武隆阿之是否廢弛尙難憑信矣又本日據常青等查奏富勒渾差委弁員向閩省取銀解交河工一事係富勒渾調任兩廣時將應行分賠豫省河工銀一萬五千兩發交藩庫收貯又雅德陸續扣存司庫養廉銀一萬兩係抵還富勒渾借項等語督撫大員同膺封疆重寄有互相稽查之責如有營私舞弊情事理應據實糾參方爲不負委任若如富勒渾雅德之通那扣抵則督撫聯成一氣不但婪贓納賄可以彼此通同甚至交結情深又何事不可爲朕將何以用人乎卽此一事雅德之過甚大在富勒渾人本蠢疏用度奢侈其縱容家

人婪索多賊及勒派書役銀兩先侵後吐各情節尙屬從前案犯
所有若雅德以密諭傳詢之事竟敢昧良徇隱公然飾詞保奏且
爲富勒渾代還借項是止知下睦而不顧大義其情節較富勒渾
尤爲可惡矣若尙因循留任督撫不知懲創從而效尤流弊伊於
何底此而不加嚴辦何以飭吏治而整官方雅德著革職所有閩
浙總督事務著常青兼署並令常青派委妥員將雅德解送浙省
交阿桂等歸案審辦閩浙總督員缺著富綱調補特成額著調補
雲貴總督所遺湖廣總督員缺著畢沅補授江蘭著補授河南巡
撫畢沅自調豫省以來辦理災賑河防事事妥協且在巡撫任內
資俸已深是以擢用總督江蘭上年查辦災賑不辭勞瘁奮勉可
嘉實係藩司中出力之員資俸已深是以加恩擢用但豫省見有
令晉民聽贖地畝一切修防等事皆關緊要不可不資熟手經理

此時河南藩司印務仍著江蘭管理畢沅亦不必交卸巡撫印務
仍留豫省會同秉公實力經理將諸事辦完畢沅酌量可以起身
時卽行奏聞候朕簡放藩司再行交卸巡撫印篆前赴湖廣新任
楚省有李侍堯在彼署理原不至乏人也特成額接奉此旨卽行
前赴雲南新任富綱俟特成額到彼再行交卸起程朕辦理庶務
一秉大公至正禍福惟其人之自取身任督撫大員者平時瞻顧
徇隱及至降旨密詢尙復代爲隱飾似此而得從寬宥其何以用
人行政耶著將雅德保奏富勒渾原摺及飭詢雅德所出總兵武
隆阿考語諭旨一併發鈔俾眾共知之